


正校
廿二史劄記

上海文瑞樓印行

津田文庫
文庫 1
1817
4



廿二史劄記卷十一

南史增梁書瑣言碎事

陽湖趙翼撰

武帝紀增帝兵圍郢州城將破有毛人數百泣投黃鵠磯蓋城之精也帝東下所乘船常有兩龍導引左右皆見之軍至建業圍六門東昏將檀和給東昏出戰因來降時民間謂密相欺者為和欺梅虫兒等曰今日敗於檀和可謂和欺矣增帝少時符瑞及在位信奉佛教重雲殿游仙化生皆動又海中浮鵠山女子獻紅席等事。

簡文紀增昭明太子夢以己班劍授簡文已而昭明薨簡文果為皇太子

元帝紀增生時符瑞武帝夢眇目僧執香爐託生宮中適采女阮姓侍側始褰帷有風回裾武帝竟感幸之遂生帝增帝工書善畫自圖宣尼像為之贊人稱三絕自承聖三年主衣庫有黑蛇丈許數十小蛇隨之帝惡之左右曰錢龍也乃取數千萬錢鎮其地以厭之又有蛇落帝帽上所御有輿中有小蛇蜿蜒其中又有龍騰空去六七小龍隨之羣魚騰躍墜死於地未幾江陵陷為西魏所滅
邾皇后傳增后酷妬及終化為龍入宮通夢於帝或見形帝體將不安龍輒激水

騰湧於露井上。常置銀轆轤金瓶灌百味以祀之。故帝終身不復娶后。

丁貴嬪傳。增。郁后遇之無道。常使日舂米五斛。每中程。若有神助者。

昭明太子傳。增。武帝在襄陽起兵時。尚未有子。在途聞太子生。又徐元瑜降。而蕭

穎胄死。人以為同時三慶。又太子十二歲時。見獄官持案牘。問左右我得判否。即

取來。皆署杖五十。有司不敢行。具以聞帝。帝笑而從之。

南康王會理傳。增。會理在湘州行事。劉納嘗禁其所為。會理乃誣以贓賄。收送建

業。納曰。我一見至尊。當使汝等知會理。遂使人殺之於路。百口俱盡。

廣陵王續傳。增。元帝母阮得幸。由丁貴嬪之力。故元帝與簡文帝相得。與續亦少

相狎。長而相謗。元帝自荊州還京。攜所寵李桃兒俱歸。時宮禁門戶甚嚴。續奏之。

元帝懼。遂先送桃兒還荊。所謂西歸內人也。後續死。元帝在荊聞之。喜躍。屢為之

破。又續好聚斂。臨終。啟上金銀器千餘件。帝乃知其多財。謝宣融曰。王之過如日

月之蝕。欲令陛下知之。故終不隱。帝意乃解。

武陵王紀傳。增。紀初授揚州時。帝於詔書內增數語曰。身白儉素。是其清也。臨財

能讓。是其廉也。知法不犯。是其慎也。庶事無留。是其勤也。後使都督益州。紀辭以

遠。帝曰。天下若亂。惟益以可免。故以處汝。汝念我老。我猶當再見汝。還益州也。

臨賀王正德傳。增。正德奔魏時。為詩納火籠中。即咏火籠曰。楨幹屈曲盡。蘭麝氣

氲消。欲知懷炭日。正是履冰朝。至魏稱被廢太子蕭寶寅。在魏請殺之不果。

蕭昂傳。增。有一女子。年二十許。散髮黃衣。在武窟山石室中。不甚食。或飲少酒。鵝

卵一二。故人呼為聖姑。求子多驗。造之者滿山谷。昂呼問。無所對。以為妖。鞭之二

十。創即差失所在。

蕭業傳。增。其父懿被害時。業與二弟藻象俱逃匿。王嚴秀家東昏收嚴秀付獄。攷

掠備至。以鉗拔手爪。至死不言。乃免禍。增。業以私米購甕。助修城工。武帝嘉之。出

刺湘州。有二虎無故斃於道。有人謂刺史德政所致。言訖不見。

蕭藻傳。增。其從孫韶為童時。庾信愛之。有斷袖之歡。衣食皆資於信。後入梁。韶鎮

郢州。信過之。韶接信甚薄。坐青油幕。引信入宴。坐信別榻。有自矜色。信不能堪。乃

徑上韶床。踐踏有饒。直視曰。官今日形容大異。韶甚慚。

永陽王敷傳。增。敷仕齊為隨郡內史。有美政。齊明帝謂徐孝嗣曰。學士不解治官。

聞蕭隨州置酒清談。而路不拾遺。

南平王偉傳。增。其世子恪為雍州刺史。任用其客江仲舉。蔡遠。王臺。卿。庾仲雍。百

姓。每有訴。必數處輸錢。民間歌曰。江十萬。蔡五百。王新車。庾大宅。武帝聞之。為接

其句曰。主人情憤不如客。

范雲傳。增雲在齊時。與明帝說夢。見太宰文宣王之事。明帝哀感。待其子昭胄等。稍弛。江祐嘗求雲女結婚。以剪刀為聘。及祐貴。雲曰。荆布之室。理隔華盛。乃還其。剪。祐別結姻。馬梁武少與雲相得。雲乃築室相依。帝每至其家。雲妻輒聞蹕聲。又嘗與雲宿。顧僧嵩舍。嵩妻方產。有鬼在外曰。此中有王有相。雲謂帝曰。王當仰屬。相以見歸。後果驗。

江淹傳。增晚年才思微退。夢張景陽向其索錦。淹探懷中數尺。與之。景陽曰。那便。割裂都盡。顧見邱遲曰。餘此數尺。聊以遺君。又夢郭璞向其索筆。淹即以五色筆。與之。爾後為詩。終無新句。

任昉傳。增昉在齊東昏時。紆意於梅虫兒。得中旨。用為中書令。往謝尚書令王亮。亮曰。卿宜謝梅。那忽謝我。增時人稱任筆沈詩。昉以為病。晚節更好作詩。欲以傾。沈而用事過多。屬詞不得流便。都下士子慕之。轉為穿鑿。於是才盡之歎矣。王僧孺傳。增僧孺論素問中。用砭石事。謂古人以石為針。許慎說文所謂以石刺病也。又載晉宋以來。譜學散亂一事。又附同時文人虞羲。邱國賓。蕭文炎。邱令楷。江洪。劉孝孫。徐黃等。因敘文炎等擊鉢立韻。響滅而詩成等事。

胡僧祐傳。增僧祐嘗以所加鼓吹。置齋中自娛。或言此是公羽儀。公名位已重。不宜若此。答曰。我性愛之。恒須見耳。出游亦以自隨。

陰子春傳。增青州有神廟。刺史王神念毀之。棟上一大蛇。長丈餘。遂入海。子春夜夢一人。乞地安置。乃辨牲醴。請召安置一處。夜夢前人來謝曰。當以一州相報。後果因破魏兵。授南青州刺史。

杜岸傳。增岸為蕭譽所擒。譽母數岸罪。岸斥之為老婢。譽命拔其舌。齧其肉而烹之。盡滅諸杜。發其冢墓。及建業平。杜前兄弟。亦發安甯陵以報。

以上所增皆瑣言碎事。無甚關係者。李延壽修史。專以博採異聞。資人談助。為能事。故凡稍涉新奇者。必羅列不遺。即記載相同者。亦必稍異其詞。以駭觀聽。如羊侃傳。謂武帝新造兩刀。稍長丈四尺。令侃試之。南史則謂長二丈四尺。梁書謂侃挽弓至十餘石。南史則云二十石。皆欲以奇動人也。然有時採掇過多。轉覺行文蕪雜者。如豫章王綜傳。正敘綜奔魏後。梁兵大潰而歸。為魏兵抄掠。而因及任煥。乘驢馬走。為抄傷足。歇橋下。抄者又至。煥足傷不能上馬。馬跪其前蹄。煥遂得騎而逸。又如王僧辨傳。正敘其攻郢州。入羅城。忽又敘有大星如車輪墜賊營。去地十餘丈。又有龍五色。光耀入鸚鵡洲水中等事。平郢州後。正

敘其進兵潯陽。忽又敘軍中多夢周何二廟神云。吾已助天子討賊。乘朱航而返。日已殺景矣。同夢者數十百人等事。及師至鵲頭。風浪大作。僧辨仰天告誓。風遂止息。忽又敘羣魚躍水飛空。官軍上有五色雲。雙龍夾檻等事。既復京師。又奉命征陸納。方敘納據長沙拒守。忽又敘天日清明。俄而大雨。時人謂為泣軍。咸知納必敗也。又有兩龍自城西江中騰躍升天。遙映江水。父老咸悲曰。地龍已去。國其亡乎。諸如此類。必一一裝入。母怪行文轉多澁滯。不如梁書之爽勁也。

梁南二史歧互處

長沙嗣王業傳。梁書敘其父懿。當東昏無道。崔慧景奉江夏王寶元圍臺。城東昏徵懿赴援。懿在歷陽。即投箸而起。進兵擊敗慧景。乃加懿侍中尚書令。而倖臣茹法珍等。忌懿功高位重。尋構東昏賜死。南史懿傳。則謂懿率兵入援時。武帝遣虞安福勸懿誅賊。後即勒兵入宮。行伊霍故事。若放兵受其厚爵。必生後悔。懿不從。遂及於難云。案懿在歷陽。聞詔即赴。一二日已達京師。敗慧景。時武帝方在襄陽。距京二千里。豈能逆知其事。而遣使在未平慧景之先。此必誤也。梁書本傳。無武帝勸懿廢立之事。南史慧景未反前。武帝遣趙祖悅勸懿興晉陽之甲。當即此一事。而係之於兩處耳。

邵陵王綸傳。梁書載其少年為丹陽尹時。侵漁細民。為少府丞。何智通所奏。綸使戴子高刺殺智通。智通子訴於闕下。帝令圍綸第。捕子高。綸匿之。竟不出。坐是罷官。後復爵。其載綸之不善如此而已。南史則增綸因帝敕責。乃取一老公類帝者。加以衰冕。朝以為君。自陳無罪。旋即剝禡。而捷之於庭。又因昭明太子薨。帝立簡文為太子。綸以為非。乃伏兵於莽。常伺車駕。有張僧倖知之。謀頗泄。又獻曲阿酒百器。帝以賜寺人。飲之而薨。帝由此始不自安。每加衛士。以警宮禁云。案綸當侯景之變。率兵赴援鍾山之戰。最力。後兵敗而逃。聞湘東王繹以兵圍河東。王譽作書勸湘東息家門之憤。赴君父之難。湘東不聽。反以兵逼綸。綸遂遁入齊昌。尚思匡復。為西魏兵所攻。被殺。是綸非肆逆者。且帝既先防其為亂。加衛士防之矣。侯景反時。豈肯又加以征討大都督之權。令其統諸軍討賊乎。此亦必南史好採異聞。而不究事之真偽也。至武陵王紀傳。梁書謂侯景之亂。紀不赴援。南史則謂紀先遣世子圓照領兵三萬。受湘東王繹節度。繹令且駐白帝。未許東下。及武帝凶問至。紀總戎將發。繹又使胡智監至蜀止之。是紀未嘗不發兵也。而梁書所謂不發兵者。蓋本元帝時國史。元帝既殺紀。欲著其逆跡。而有是言。所謂欲加之罪。其

無辭乎。此書當以南史為正。

王僧孺傳。梁書載其為南康王長史。時被典籤中傷去職。奉辭王府一箋。凡千餘字。案箋內有云。去矣何生。高樹芳烈之語。既辭王府。何以獨稱何生。殊不可解。南史雖刪此文。而謂僧孺將去。有友人何炯。猶在王府。僧孺與炯書。以見意。然後何生句始明。蓋別何炯書。非辭王府箋也。此又可見南史詳細處。至任昉傳。梁書南史俱謂昉出為新安太守。卒於官。而劉孝標廣絕交論有云。瞑目東粵。貌爾諸孤。流離大海之南。寄命瘴癘之地。是則昉沒於粵。非沒於新安也。二書俱誤。

南史於陳書無甚增刪

南史於他書多所增刪。獨至陳書則甚少。今以兩書比對。如杜僧明。周文育。侯安都。侯瑱。歐陽頎。吳明徹。黃法甍。高子量。章昭達。程靈洗等傳。大概相同。但稍節其字句耳。其陳書所有。而南史刪之者。周鐵虎傳。刪馬明戰死之事。任忠傳。刪後主倖臣沈客卿施文慶弄權誤國之事。華皎傳。刪戴僧朔曹慶錢明本魯閑席慧略等附見之事。傅縡傳。刪其明道論一篇。沈炯傳。刪其請終養一疏。答詔一道。江總傳。刪其修心賦一篇而已。其陳書所無而增之。及陳書所略而詳之者。如蕭摩訶傳。隋將賀若弼兵至建業。魯廣達力戰。賀若弼與七總管兵八千人。各勒陣以待之。弼躬當廣達麾下死者二百七十餘人。弼縱烟以自隱。窘而復振。陳人得人頭輒走。獻後主取賞。弼更趨孔範軍。範敗走。陳軍遂潰。隋將擒蕭摩訶。送弼。弼以刀臨頸。辭色不撓。乃釋而禮之。又陳慧紀傳。慧紀聞隋師攻建業。先遣呂肅據巫峽。以鐵鎖橫江。四十餘戰。隋軍死者五千餘人。陳軍盡取其鼻。以邀賞。既而隋軍獲陳卒。則縱遣之。別帥廖世寵詐降於隋。欲燒隋艦。風浪大起。火反燒陳船。陳軍大敗。慧紀尚率兵東下。隋晉王廣遣使以慧紀子來諭降。又使降將樊毅等。諭上流城戍悉解。慧紀不得已乃降。此陳書所略而詳之者也。任忠傳。忠降隋數年而死。隋文帝謂羣臣曰。平陳之初。我悔不殺任蠻奴。受人榮祿。兼當重寄。不能橫屍。而云無所用力。與宏演納肝。何其異也。傅縡傳。縡以直諫死。死後有蛇屈尾來上靈座。去而復來。百餘日。時時有彈指聲。吳明徹傳。明徹為周所擒。封懷德郡公。表陽王叔達傳。陳書止載其入隋為絳郡通守。南史並載其入唐為禮部尚書。此皆陳書所無。而南史增之者也。其餘但刪減行墨。而絕無添列事蹟。蓋李延壽修南北二史。閱十七年。至修陳書。則已精力漸竭。故不能多為搜輯耳。

南史與陳書互處

南史於陳書雖無甚增刪。然如衡陽王傳。直書其為文帝所害。始興王伯茂傳。直

書其為宣帝所害。劉師知傳直書其害。梁敬帝之事。使奸惡不能藏匿。此最有功於陳書。事俱見陳書。避諱條內。其他有與陳書歧互者。長沙王叔堅傳。陳書謂後主侍堅漸薄。堅不自安。乃為左道祈福。刻木作偶人。衣以道士服。晝夜醮之。有人上書告其事。後主令宣敕責之。堅曰。非有他故。但欲求親媚耳。是左道厭魅。叔堅實有其事也。南史則云。後主陰令人造其厭魅之具。又令人告之。案驗令實。是叔堅本無此事。而後主誣陷之耳。又江總自序。太建之末。權移羣小。屢被推黜。生平惟奉佛教。深悟苦空。陳書本傳。謂此序時人謂之實錄。南史則謂此敘識者譏其言跡之乖。惟此兩傳。二書歧互。觀於江總諂事後主。與自序不同。則亦當以南史為定也。

宋齊多荒主

古來荒亂之君。何代蔑有。然未有如江左。宋齊兩朝之多者。宋武以雄傑得天下。僅三年。而即有義符。文帝元嘉三十年。號稱治平。而未有元凶劬之悖逆。孝武僅八年。而有子業。明帝亦八年。而有昱。齊高武父子僅十五年。而有昭業。明帝五年。而有寶卷。統計八九十年中。童昏狂暴。接踵繼出。蓋劫運之中。天方長亂。創業者不永年。繼體者必敗德。是以一朝甫興。不轉盼而輒覆滅。此固氣運使然也。今摘於左。宋少帝義符。武帝之長子也。善騎射。解音律。即位後。所為多乖戾。於華林園為列肆。親自酤賣。又開瀆聚土。以象破岡。埭與左右引船唱呼。以為歡樂。徐羨之等廢立之夕。帝方遊天泉池。即龍舟而寢。詰朝未興。兵士進殺二侍者。並傷帝指。扶出東閣。收璽綬。羣臣拜辭。以皇太后令。廢為營陽王。遂徙於吳郡。未幾羨之等使中書舍人邢安泰。弑帝於金昌亭。帝有勇力。不受制。突走出昌門。追以門闔踣之而殞。前廢帝子業。孝武帝之長子也。幼而狷急。在東宮。每為孝武所責。孝武西巡。帝參承起居。書迹不謹。孝武責之曰。書不長進。此是一條耳。初即位。受璽綬。傲然無哀容。始猶難諸大臣。及戴法興等。既殺法興。於是又誅羣公。太后疾篤。呼帝。帝曰。病人間有鬼。那可往。太后怒。謂侍者曰。將刀來破我腹。那得生此寧馨兒。山陰公主帝妹也。淫恣過度。帝為置面首左右三十人。每出。使公主與朝臣共陪輦。自以在東宮時。不為孝武所愛。將掘其景寧陵。太史言不利於帝而止。乃縱糞於陵。罵孝武為麟奴。又掘殷貴妃墓。忿其在孝武時專寵也。文帝第十女新蔡公主。帝之姑也。納之宮中。立為貴嬪。改姓謝氏。殺一婢。假稱公主薨逝。以鸞輅龍旂送還其家。又忌諸父。建安王休仁。湘東王彧。即明帝。山陽王休祐。聚之殿內。毆捶陵曳。無所不至。三王並肥壯。帝以籠盛之。或尤肥。號為猪玉。號休仁為殺玉。休祐為賊王。嘗以木槽盛飯。納諸雜食。攪和之。裸或入地坑中。令以口就槽食之。以為

歡笑。令左右淫休仁生母楊太妃備諸醜狀。又令淫南平王敬猷母不從。即殺敬猷及其弟敬先敬淵。時廷尉劉蒙妾有孕。帝迎入宮。冀生男。立為太子。會或嘗忤旨。帝裸之。縛其手脚。以杖貫之。使擔付大官。即日屠豬。休仁笑曰。未應死。帝問其故。休仁曰。待皇子生。殺豬作湯餅。帝意解。乃一宿出之。將南巡荆湘。期旦殺。或休仁等然後發引。是夜或與帝倖臣阮佃夫王道隆李道兒密結。帝左右壽寂之姜產之等十一人共謀殺帝。先是帝遊竹林堂。使婦人裸身相逐。一婦人不從。命斬之。夜夢一女子罵其悖虐無道。帝怒於宮中求得貌類所夢者戲之。是夕又夢所戳女罵曰。汝枉殺我。我訴上帝矣。至是巫言此堂有鬼。帝與山陰公主及六宮綵女數百人捕鬼。帝親射之事畢。將奏樂。壽寂之懷刀入。姜產之為副。諸姬皆走。帝亦走。追及之。大呼寂寂者。三手不能舉。乃被弑。後廢帝昱。明帝之長子也。五六歲即能緣漆竿。去地丈餘。食頃方下。漸長喜怒乖節。左右失旨者。手加撲打。及即位。內畏太后。外憚大臣。未得肆志。三年後好出入。單將左右。或十里。或二十里。或入市中。遇謾罵則悅而受焉。四年後無日不出。與解僧智張五兒恒夜出承明門。夕去晨返。晨出暮歸。從者並執鋌矛。道上男婦及犬馬牛驢。值無免者。人間白晝不開門。道無行人。嘗著小裊裙。不衣冠。有白楮數十。鉗鑿刀。鋸不離左右。為擊腦。

槌陰剖心之誅。日有數十。至屍卧流血。然後快。左右人見之。有舉眉者。帝即令正立。以矛刺之。曜靈殿養驢數十頭。所自乘馬。養於御床側。與右衛營女子私通。每從之。遊持數千錢為酒肉費。出逢婚姻葬送。輒與挽車。小兒羣飲。以為歡。既殺阮佃夫。佃夫有腹心人張羊逃匿。後捕得。自以車轆殺之。殺杜延載。杜幼文。皆手自鬻割。察孫超有蒜氣。剖腹視之。執盾馳馬。自往刺杜叔文於元武湖北。聞沈勃多寶貨。往劫之。揮刀獨前。勃知不免。手搏帝耳罵之曰。汝罪踰桀紂。遂見害。帝嘗露車一乘。以出入。從數十人。羽儀追之。恒不及。又各慮禍。亦不敢追。但整部伍。別在一處。瞻望而已。凡諸鄙事。過目即能鍛銀裁衣作帽。無不精絕。未嘗吹篳執管。便韻。天性好殺。一日無事。既慘慘不樂。內外憂惶。夕不及旦。蕭道成與直閣將軍王敬則謀之。七月七日。帝微行出北湖。張五兒馬墜湖。帝自馳騎刺馬屠割之。與左右作羌胡伎為樂。又於臺岡賭跳。後往青園尼寺新安寺偷狗。就曇度道人煮之飲酒。楊玉夫嘗有寵。忽然見憎。見輒切齒曰。明日當殺小子。是夜令玉夫伺織女渡河來報。因與內人穿針。託大醉卧於仁壽殿東阿暹幄中。王敬則先結玉夫及陳奉伯楊萬年等二十五人。是夕玉夫俟帝眠熟。與萬年同入暹幄。取千牛刀殺之。齊廢帝鬱林王武帝之孫文惠太子之子也。文惠早薨。武帝立為皇太孫。性

辨慧。陰懷鄙慝。與左右無賴二十餘人。共衣食卧起。妃何氏擇其中美者。皆與交歡。密就富人求錢。無敢不與。凡諸小人。皆預加爵位。許以南面之日。即便施行。師史仁祖。侍書胡天翼。懼禍。皆自殺。文惠太子每節其用度。帝謂豫章王妃曰。阿婆佛法。言有福生帝王家。今反是大罪。不如市邊屠沽。文惠疾及薨。帝侍疾居喪。哀容號毀。見者皆嗚咽。纔還內室。即歡笑飲食。備極甘滋。葬畢。立為皇太孫。武帝往東宮。帝迎拜號慟。欲絕。武帝自下與抱持之。以為必能負荷也。帝令女巫楊氏禱祠。速求天位。文惠之薨。謂由楊氏之力。又令禱祈武帝晏駕。武帝疾甚。帝與妃何氏書紙中央。作大喜字。而作三十六小喜字。繞之。武帝臨崩謂曰。五年中一委宰相。五年以後。勿復委人。執帝手曰。阿奴若憶翁當好作。如此者再。大斂始畢。即呼武帝諸伎奏樂。又好狗馬。即位未旬日。即毀武帝招婉殿。作馬埒。馳騎而墜。面額並傷。稱疾不出者數日。多聚名鷹快犬。飼以梁肉。武帝梓宮下渚。帝於端門內奉辭。便稱疾還內。奏胡伎鞞鞞之聲。響震內外。王敬則問蕭坦之曰。不太怱怱邪。坦之曰。此是內人哭響徹耳。山陵之後。微服遊市里。多往文帝陵燧中。與羣小作諸鄙褻。擲塗賭跳。放鷹走狗。極意賞賜。動至數十萬。每見錢曰。我昔思汝一个不得。今日得用汝。未武帝聚錢。上庫五億萬。齊庫三億萬。金銀布帛。不可勝計。未期年。

用已過半。以諸寶器相擊剖碎。以為笑樂。好鬪雞買雞。價至數千。徐龍駒為後宮舍人。日夜在宮內。帝與文帝幸姬霍氏私通。改姓徐氏。龍駒勸長留宮中。聲云度霍氏為尼。以餘人代之。皇后亦淫亂。齊閣通夜洞開。內外無別。西昌侯鸞即明使蕭謹等誅倖臣曹道剛朱隆之等。卒兵自尚書省入。王晏徐孝嗣等繼進。帝在壽昌殿。方裸身與霍氏相對。謹兵入宮。帝走向徐姬房內。拔劍自刺。不入。以帛纏頭。頸輿接出西弄。遇弒。齊廢帝東昏侯寶卷。明帝第二子也。以母后故。立為皇太子。在東宮好弄。不喜書學。嘗夜捕鼠。達旦以為樂。明帝臨崩。囑以後事曰。作事不可在人後。故委任羣小。誅殺大臣。性訥澁。少言。不與朝士接。惡明帝靈在太極殿。欲速葬。徐孝嗣力爭。得踰月。每當哭。輒云喉痛。羊闡入臨。無髮。號慟俯仰。情遂落地。帝大笑曰。此禿秋啼來乎。自江祐等誅後。無所忌憚。日夜戲馬。擊鼓吹角。左右數百人。叫雜以羌胡橫吹諸伎。嘗以五鼓就卧。至晡乃起。王侯朝見。至晡乃得前。或際暗遣出臺閣。奏茶。不知所在。闕豎以紙包裹魚肉。還家。並是五省黃案也。元旦朝會。食後方出。禮纔畢。便還西序寢。百僚陪位者。自己至申。皆僵仆。拜潘妃為貴妃。乘卧輿。帝騎馬從後。著織成袴褶。金薄帽。七寶稍。金銀校具等。各有名字。戎服急裝。不避寒暑。陵冒雨雪。馳騁阮屏。渴輒下馬。取腰邊蠶器酌水飲之。乘具懼

為雨溼。織雜采珠為覆。好為擔幢。初學時。幢每傾倒。其後白虎幢七丈五尺。齒上擔之。折齒不倦。黃門五六十人為騎客。又選無賴善走者為逐馬。置射雉場二百六十處。騎中惟幢。皆紅綠錦為之。金銀鏤弩牙。瑇瑁帖箭。每出與鷹犬隊。主徐令孫。騎隊主俞靈韻。齊馬而走。又不欲人見之。驅逐百姓。惟置空宅。一月率二十餘出。既往無定處。尉司常慮得罪。東行驅西。南行驅北。應旦出。夜便驅逐。打鼓踏園。鼓聲所聞。便應走避。避不及者。應手格殺。從萬春門東至郊外。數十里。皆懸幔為高幃。處處禁斷。疾病者悉扛移無人扛者。扶匍道側。吏司又捶打。絕命者相繼。有棄病人於青溪邊者。吏懼帝見。推置水中。須臾便死。魏興太守王敬賓。新死未斂。家被驅不得留視。及還。兩眼已為鼠食盡。有一婦人當產。不能去。帝即剖其腹看男女。長秋卿王儼病篤。不得留家。乃死於路邊。丹陽尹王志被驅。狼狽步走。藏酒鑪邊。至夜半方得歸。蔣山定林寺一僧。病不能去。立殺之。左右韓暉。光曰。老道人可念。帝曰。汝見麀鹿。亦不射耶。璿儀等殿及華林秘閣。三千餘間。盡被火燒。有左右趙鬼者。能誦西京賦云。柏梁既災。建章是營。於是大起芳樂。芳德等殿。又為潘妃起神仙永壽玉壽三殿。皆飾以金璧。莊嚴寺有玉九子鈴。外國寺佛面有光相。禪靈寺塔有諸寶珥。皆剔取以為殿飾。又鑿金為蓮花。使潘妃行其上。曰。步步生蓮花也。潘氏服御。極選庫物。不周。貴市人間金寶。價皆數倍。琥珀釧一隻。直百七十萬。又訂出雄雉頭。鶴。白鷺。縷百品千條。無復窮已。親倖小人。因緣為奸。科一輸十。百姓困窮。號泣滿路。凡諸市買。遇便掠奪。商旅無訴。又以閱武堂為芳樂苑。當暑種樹。朝種夕死。徵求人家。望樹便取。毀牆撤屋出之。合抱者亦皆移植。取玩。俄頃烈日中。至便焦枯死。而又種無復已。極諸樓壁上。畫男女私褻之狀。明帝時所聚金寶。悉泥而用之。猶不足。令富戶買金。限以賤價。又不還直。潘妃威行遠近。父竇慶挾勢逞毒。富人悉誣以罪。而沒入之。潘妃生女。百日而亡。帝為制哀經。羣小來弔。帝蔬膳積旬。不聽音伎。閹人王寶孫等。共治有羞。為天子解菜。又於苑中立店肆。帝與宮人等共為裨販。以潘妃為市令。自為市吏錄事。帝小有失。妃亦于杖。乃殺虎。賁不得進大荆。雖畏潘氏。而私與諸姊妹淫通。又開渠立埭。躬自引船。埭上設店。坐而屠肉。於時百姓歌云。閱武堂種楊柳。至尊屠肉。潘妃沽酒。朱光尚託鬼道。謂帝曰。向見先帝。瞑怒。帝乃縛菰為明帝形。北向斬之。懸首苑門。會魏師來伐。令揚南徐二州人。三丁取兩。達郡悉令上米。一人准五十斛。輸米既畢。就役如故。蕭衍師至。帝袴褶登南掖門。又虛設馬仗。千人張弓。拔白出東掖門。稱蔣王出。盡外圍既立。屢戰不勝。帝猶惜金錢。不肯賞賜。茹法珍叩頭請之。帝曰。賊來獨

取我耶。何為就我求物。將軍王珍國張稷等懼禍。乃結後閣舍人錢強遊盪主崔叔智。夜開雲龍門。稷珍國勒兵入殿。帝方吹笙歌。作兒女子。卧未熟。聞兵入。急趨出。闈人黃泰平刃傷其膝。直後張齊斬首送蕭衍。宣德太后令廢為東昏侯。陳後主叔寶。宣帝嫡長子也。即位後。荒於酒色。不卹政事。左右嬖佞。珥貂者五十人。婦人美麗從者千餘人。常使張貴妃孔貴人等八人夾坐。江總孔範等十人預宴。號曰狎客。先令八婦人擘米菱。製五言詩。十客一時繼和。遲罰酒。君臣酣飲。從夕達旦。以此為常。盛修宮室。無時休止。稅江稅市。征取百端。刑罰酷濫。牢獄常滿。隋兵至。入井避之。軍人呼之不應。欲下石。乃聞呼聲。以繩引之。驚其太重。及出。乃與張孔二嬪同乘而上。高頴入宮。見其臣下所啟軍事。猶在牀下。尚未啟封也。入隋以善終。以上皆魏徵史論。後主於光熙殿前。起臨春結綺望仙三閣。閣高數丈。並數十間。其窗牖壁帶。懸楣欄檻之類。並以沈檀香木為之。又飾以金玉。間以珠翠。外施珠簾。內有寶牀寶帳。其服玩之屬。瑰奇珍麗。近古所未有。每微風暫至。香聞數里。朝日初照。光映後庭。其下積石為山。引水為池。植以奇植。雜以花藥。後主自居迎春閣。張貴妃居結綺閣。龔孔二貴嬪居望仙閣。並複道交相往來。又有王李二美人。張薛二淑媛。袁昭儀。何婕妤。江脩容等七人。並有寵。遞代以遊其上。以宮

人有文學者。袁大捨等。為女學士。後主每引賓客對貴妃等遊宴。則使諸貴人及女學士。與狎客共賦新詩。互相贈答。採其尤豔麗者。以為曲詞。被以新聲。選宮女有容色者。以千百數。令習而歌之。分部迭進。持以相樂。其曲有玉樹後庭。花臨春樂等。大指所歸。皆美張貴妃孔貴嬪之容色也。其略曰。璧月夜夜滿。瓊樹朝朝新。而張貴妃髮長七尺。鬢黑如漆。其光可鑑。特聰慧有神采。進止閑雅。容色端嚴。每瞻視盼睐。光采溢目。照映左右。常於閣上。靚妝臨於軒檻。宮中遙望。飄若神仙。才辯強記。善候人主顏色。是時後主急於政事。百司啟奏。並因宦者蔡脫兒李善度進請。後主置張貴妃於膝上。共決之。李蔡所不能記者。貴妃並為條疏。無所遺脫。由是益加寵異。冠絕後庭。而後宮之家。不遵法度。有挂於理者。但求哀於貴妃。貴妃則令李蔡先啟其事。而後從容為言之。大臣有不從者。亦因而讚之。所言無不聽。於是張孔之勢。薰灼四方。大臣執政。亦從風而靡。闈宦使佞之徒。內外交結。轉相引進。賄賂公行。賞罰無常。綱紀替亂矣。

案宋齊陳書及南史所記如此。其無道最甚者。其受禍亦最烈。若僅荒於酒色。不卹政事。則雖亡國。而身尚得全。又可見劫運煩促中。仍有報施不爽者。可以觀天咫矣。

宋世閨門無禮

宋武起自鄉豪以詐力得天下其於家庭之教固未暇及也是以宮闈之亂無復

倫理趙倩尚文帝女海鹽公主始興王濬出入宮掖與主私通倩知之與主肆詈

搏擊至引絕帳帶事上聞文帝詔離婚殺主所生母蔣美人宋書趙倫之傳如此

人間咸有醜聲宮掖事秘莫能辨也路太后又與南郡王義宣諸女淫亂義宣因

此發怒遂舉兵反義宣義宣敗後帝又密取其女入宮假姓殷氏拜為淑儀左右

宣泄者多死殷卒帝命謝莊作哀冊文殷淑前廢帝子業以文帝女新蔡公主為

貴嬪改姓謝氏殺一宮婢代之詭言主薨以武貴級戟鸞輅龍旂送還其家廢帝

後宮數百而妾惟駙馬一人事不均平一何至此帝為置面首左右三十人公主

又以吏部郎褚淵貌美就帝請以自侍備見逼迫十餘日淵誓死不回乃得免廢

紀帝又使左右淫建安王休仁母楊太妃劉道隆欲得帝歡盡諸醜狀休仁妃殷

氏有疾召祖翻診視祖翻貌美殷悅之遂與姦事泄遣還家賜死仁傳明帝內宴

裸婦人而觀之以為歡笑王皇后獨以扇障面帝怒曰外舍寒乞今共為樂何為

不視后曰為樂之方甚多豈有姑姊妹相聚而裸婦人形體以此為樂實外舍所

無帝大怒王皇后帝又以妃陳氏賜李道兒尋又迎還生後廢帝故人間皆呼廢帝

為李氏子廢帝亦自稱李將軍或自謂李統陳太妃帝又素肥晚年廢疾不能內御

諸弟姬人有孕者輒取入宮生子則殺其母而與六宮所愛者養之順帝本桂陽

王休範子也以陳昭華為母陳昭此見於紀傳者宮庭內習尚如此宜乎士大夫

以聯姻帝室為畏途且凡為公主者皆淫妬人主亦自知之故江數當尚主明帝

使人代數作辭婚表徧示諸公主以愧厲之文穆皇亦一代得失之林也

齊鬱林尊其母王太后稱宣德宮置男左右三十人前代所未有也南文王

梁武與殷叡素舊乃以女永興公主妻其子鈞鈞形貌短小為主所憎每被召

入先滿壁書殷叡字鈞輒流涕而出主又命束而反之鈞不勝怒而言於帝帝

以屏如意擊主碎其背是梁時公

宋子孫屠戮之慘

宋武帝七子長義符即位以失德為徐羨之等所廢殺於金昌亭次廬陵王義真

亦被廢殺於新安郡次文帝義隆為其子劭所殺次彭城王義康為文帝賜死其

次江夏王義恭為前廢帝所殺先有十二子盡為劭所殺後次南郡王義

宣以謀反為朱脩之所殺其長子恢自殺。愷逃在民間亦捕殺。次衡陽王義季以飲酒致殞。傳國至孫齊受禪國除。是武帝七子。惟義季善終。有後。其餘皆死於非命。且無後也。文帝十九子。長元凶劭。次始興王濬。皆以弑逆被誅。劭四子。濬三次。孝武帝次南平王鑠。為孝武酖死。其子敬猷。敬淵。敬先。皆為前廢帝所殺。次廬陵王紹。出繼義真。以善終。即前廢帝所殺者。次竟陵王誕。為孝武所忌。使沈慶之攻殺之。無子。次建平王宏。善終。其子景素。後廢帝時被殺。並殺其子延齡。及二少子。次廬江王禧。明帝逼令自殺。有子克明。無子。次晉熙王景。前廢帝欲討之。乃奔魏。有二妾。還都各生一子。尋皆殤。明帝以子變繼之。齊受禪。賜死。惟景奔魏。後為駙馬都尉。有子承緒。孫文達等。次武昌王渾。孝武帝逼令自殺。無子。次明帝。次始安王休仁。為明帝所忌。賜死。伯融伯猷。後廢帝時為楊運長等所殺。次晉平王休祐。明帝使人觸之。墜馬死。有十三子。順帝時。蕭次海陵王休茂。以反被殺。次鄱陽王休業。臨慶王休倩。新野王夷父。皆早卒。次桂陽王休範。舉兵討蕭道成。為張敬兒所殺。牛智藏。皆被殺。次巴陵王休若。為明帝賜死。子冲。是文帝十九子。惟孝武及明帝嗣位。紹及宏善終。景奔魏。休業休倩夷父早卒。其餘皆不得死。且亦無後也。孝武帝二十八子。大殤者十。為前廢帝所殺者二。為明帝所殺者十六。見南史。誤。處條內。當明帝時。以孝武子孫。誅殺已盡。轉以己子武陵王贊為孝武後。則孝武子孫。已無一在者可知也。案劉休傳。明帝素肥。痿不能

御內。諸王妾有孕者。密取入宮。生子則閉其母於後房。順帝本桂陽王休範子也。蒼梧亦非帝子。陳太妃先為李道兒妾。故蒼梧自稱李統云。然則明帝雖有十二子。皆非親子也。而何以自護其假子。而盡殺祖宗之子孫。卒之十二子中。後廢帝及順帝。皆為蕭道成所弑。隨陽王翽。新興王嵩。始建王禧。亦為道成所殺。智井變。躋皆出繼。而變亦為道成所殺。智井變。生卒不可攷。惟法良及邵陵王友。暨第四子之未名者。以早夭免誅。然則明帝十二子。其真偽本不可知。而即其自號為親子者。天卒不過數人。其餘亦皆不得其死。且皆年幼無子也。南史順帝紀。謂帝遜位被害。後宋之王侯。無少長皆盡矣。然則宋武九子。四十餘孫。六七十曾孫。死於非命者。十之七八。且無一有後於世者。當其勃馬興也。子孫繁衍。為帝為王。榮貴富盛。極一世之福。及其敗也。如風之捲。掃而空之。橫屍喋血。斬艾無噍類。欲求為匹夫之傳家保世。而不可得。斯固南北分裂時。劫運使然。抑亦宋武以猜忍起家。肆虐晉室。戾氣所結。流禍於後嗣。孝武明帝。又繼以凶忍慘毒。誅夷骨肉。惟恐不盡。兄弟子姪。悉草薶而禽獮之。皆諸帝之自為屠戮。非假手於他族也。卒至宗支盡而已。之子孫。轉為他族所屠。豈非天道好還之明驗哉。前廢帝嘗夢其母王太后謂之。汝不孝不仁。本無人君之相。子尚愚悖。亦非運祚所及。孝武險虐滅

道。怨結神人。兒子雖多。並無天命。是冥冥中固有鑒觀不爽者。孝武既以多殺文
帝子而絕嗣。明帝又以多殺孝武子。而其子亡國殞身。無復子遺。真所謂自作之
孽也。

廿二史劄記卷十一

廿二史劄記卷十二

陽湖趙翼撰

人君即位冠白紗帽

宋前廢帝子業將殺湘東王彧。或結左右壽寂之等。弑帝於後堂。建安王休仁便
稱臣。引彧升西堂。登御座。事出倉猝。猶著烏紗帽。休仁呼主衣以白紗帽代之。乃
即位。是為明帝。明帝紀後廢帝豈無道。蕭道成使王敬則結帝左右陳奉伯等弑之。
明旦召大臣會議。敬則遽呼虎賁。鉞戟羽儀。手自取白紗帽加道成首。令道成即
位。曰。事須及熟。道成呵之。乃止。齊高帝紀又齊書柳世隆傳。沈攸之起兵。謂諸將曰。我
被太后令。建義下都。大事若剋。白紗帽當共著耳。是古來人君即位例。著白紗帽。
蓋本太子由喪次即位之制。故事相沿。遂以白紗帽為登極之服也。

齊梁之君多才學

創業之君。兼擅才學。曹魏父子固已曠絕百代。其次則齊梁二朝。亦不可及也。齊
高帝雖不以才學名。然少為諸生。劉勰傳從雷次宗受業。治禮及左氏春秋。紀為領
軍時。與謝超宗共屬文。愛超宗才翰。超宗傳即位後。見武陵王奕。效謝康樂體詩。訓
之曰。康樂放蕩。作體不辨首尾。安仁士衡。深可宗尚。顏延之抑其次也。是帝之深

於詩文也。奕傳又嘗與王僧虔賭書畢。謂僧虔曰。誰為第一。僧虔曰。臣書第一。陛下亦第一。帝笑曰。卿可謂善自為謀。僧虔傳是帝之精於書法也。其子孫亦多以才著。臨川王映。能左右書。映傳鄱陽王鏘。好文章。桂陽王鐸。好名理。人稱為鄱桂。江夏令。王鋒。五歲學鳳尾諾。一學即工。十歲能屬文。武帝謂其書為第一。明帝輔政。翦除高武子孫。鋒作修柏賦。以寓意。解此其子之多才學也。文惠太子臨國學。與王儉講禮記。母不敬。周易乾震之義。文惠傳竟陵王子良。招致學士。鈔五經百家。為四部要略千卷。子良傳晉安王子懋。撰春秋例苑三十卷。子懋傳隨郡王子隆。能文武。帝曰。此我家東阿也。子隆傳此其孫之多才學也。而諸孫中。尤以豫章王嶷之諸子為最。子範入梁。為南平王從事。製千字文。令蔡遠注之。府中文筆。皆子範屬草。簡文遣侯景之逼。葬其后。使子範作哀冊。文詞極工。惋帝曰。此段莊陵萬事零落。惟哀冊尚有典型。子顯著鴻序賦。沈約見之。極為傾倒。又採眾家後漢書。考正同異。作後漢書一百卷。又撰齊書六十卷。普通北伐記五卷。貴儉傳三卷。文集二十卷。其子愷亦工詩。於宣猷堂。與諸名人餞謝朓出守。賦詩用十五劇韻。獨先就。又極工。子顯弟子雲。有文藻。弱冠撰晉書。年二十六。書成百餘卷。又工書。百濟國使人求其書。值子雲將出都。使者望船。一步一拜。子雲遣問之曰。侍中尺牘之美。名聞

海外。今日所求。惟在名迹。乃停舟書三十紙與之。其子特亦工書。梁武謂之曰。子敬之迹。不及右軍。蕭特之筆。遂過於父。子雲傳此亦蕭齊後人。負一代文學之望者也。至蕭梁父子間。尤為獨擅千古。武帝少而篤學。洞達儒玄。雖萬機多務。猶卷不輟手。造制旨孝經義。周易講疏。及六十四卦。二繫文言序卦等義。樂社義。毛詩答問。春秋答問。尚書大義。中庸講疏。孔子正言。老子講疏。共二百餘卷。又令明山賓等述制旨。並撰吉凶軍賓嘉五禮。一十餘卷。又造通史。親制讚序。凡六百卷。天性睿敏。下筆成章。千賦百詩。直疏便就。諸文集又一百卷。並撰金策三十卷。兼長釋義。製涅槃大品淨名三慧諸經義。又復數百卷。歷觀古帝王。藝能博學。罕或有焉。本武紀昭明太子。三歲受孝經論語。五歲遍讀五經。及長讀書。數行並下。過目皆憶。每遊宴祖餞。賦詩輒十數韻。或作劇韻。皆屬思便成。無所點易。著文集二十卷。古今典故。文言為正序十卷。五言詩之善者。為文章英華二十卷。文選三十卷。本簡文帝六歲便能屬文。既長。九流百氏。經目必記。篇章詞賦。操筆立成。博綜儒書。善言立理。自序其詩云。余七歲有詩癖。長弗倦也。史論謂其傷於輕豔。當時號曰宮體。所著昭明太子傳五卷。諸王傳三十卷。禮大義二十卷。老子義二十卷。莊子義二十卷。長春義記一百卷。法寶連璧三百卷。本紀元帝好學。博極羣書。才辨敏速。冠絕

一時著孝德傳三十卷。忠臣傳三十卷。丹陽尹傳十卷。注漢書一百一十五卷。周易講疏十卷。內典博要一百卷。連山三十卷。洞林三卷。玉韜十卷。老子講疏四卷。全德志懷舊志。荆南志。江州記。貢職圖。又古人名錄一卷。筮經十二卷。武贊三卷。文集五十卷。本南康王績。七歲有人洗改官文書者。即能察出。本邵陵王綸。預饒衡州刺史。元慶和於坐。賦詩十二韻。末云。方同廣川國。寂寞久無聲。武帝大賞之曰。汝人才如此。何慮無聲。其後湘東王繹。與河東王譽交兵。綸作書勸其息。家庭之爭。赴君父之急。詞極愷切動人。本武陵王紀。少勤學。有文才。屬詞不好輕華。甚有骨氣。本此梁武父子間才學也。帝弟南平王偉。精立學。著二旨義。別為新通。又製性情機神等論。周捨殷芸俱不能屈。本鄱陽王恢獵史籍。本安成王秀。精意學術。搜集傳記。招劉孝標為類苑。未畢而已行於世。本此又帝諸弟之才學也。昭明諸子。史不著其能。文簡。文子大心。幼聰明。善屬文。大臨以明經射策甲科。大連少俊爽。工文。兼善丹青。武帝賜以馬。即為謝啟。其詞甚美。大鈞七歲學詩。武帝賜以王羲之書一卷。元帝子方等。嘗著論以魚鳥自況。因不得於父也。曾注范尉宗後漢書。未就。所撰三十國春秋。及靜住子。行於世。第三子方諸。博學明老易。善談玄。詞辨風生。南康王績。子會理。少聰慧。好文史。其弟通理。博學有文才。嘗祭孔。

文舉墓為之立碑。其文甚美。邵陵王綸子堅。善草隸。其弟確。尤工楷法。公家碑誌皆令書之。除秘書丞。武帝謂曰。以汝能文。故有此授。武陵王紀子園正。為元帝囚於荊州。曾有連句詩曰。水長二江急。雲生三峽昏。願賞淮南罪。思報阜陵恩。元帝覽詩而泣。此皆見於各本傳者。此武帝諸孫之才學也。帝兄懿之子淵藻。善屬文。尤好古體。非公宴不妄作。雖小文成。輒棄本。懿之孫孝儼。從帝遊華林園。於坐獻相風烏華光殿。景陽山等頌。南平王偉之孫靜。宗室後進。有文才。篤志好學。散書滿席。手自校讐。鄱陽王恢之子範。雖無學術。而率意題章。皆有奇致。嘗得舊琵琶。齊竟陵王子良舊物也。即攬筆為咏。以示相東王。王作琵琶賦和之。始興王憺之子映。因野穀生為嘉穀頌。其弟奕。當簡文入居監撫。為儲德頌以獻。安成王秀之子機。博覽彊記。有詩賦數千言。元帝序而傳之。機弟推亦善屬文。為簡文所賞。此亦皆見於本傳者。又帝從子從孫之才學也。

齊明帝殺高武子孫

宋子孫多不得其死。猶是文帝孝武廢帝明帝數君之所為。至齊高武子孫。則皆明帝一人所殺。其慘毒自古所未有也。明帝本高帝兒子。早孤。高帝撫之。恩過諸子。歷高武二朝。爵通侯。官僕射。至鬱林王時。輔政。因鬱林無道。弑之而立海陵。不

數月又廢弑之而奪其位。自以得不以正。親子皆幼小。而高武子孫日漸長大。遂盡滅之。無遺種。傳子岳。今按高帝十九子。長武帝。次豫章王嶷。臨川王映。長沙王晃。武陵王奕。安成王暉。始興王鑑。皆卒於明帝前。故未被害。又早殤者四人。其餘鄱陽王鐸。桂陽王鐸。江夏王鋒。南平王銳。宜都王鏗。晉熙王鈺。河東王鈺。衡陽王鈞。皆明帝所殺也。武帝二十三子。長文惠太子早薨。次竟陵王子良。善終。魚復侯子響。武帝時以擅殺長史。拒臺兵。見殺。又早殤者四人。其餘廬陵王子卿。安陸王子敬。晉陵王子懋。隨郡王子隆。建安王子真。西陽王子明。南海王子罕。巴陵王子倫。邵陵王子貞。臨賀王子岳。西陽王子文。衡陽王子峻。南康王子琳。湘東王子建。衡陽王子珉。南郡王子夏。皆明帝所殺也。文惠太子子鬱。林王昭業。海陵王昭文。既為明帝所弑。巴陵王昭秀。桂陽王昭榮。亦明帝殺之。甚至竟陵王子良之子昭胄。昭穎。亦明帝所殺。統計高帝後。惟豫章王嶷有子。子廉。子恪。子操。子範。子顯。子雲。等有後於梁。其餘諸子。及武帝文惠諸子孫。大半皆被明帝之禍。且俱無後。按齊高嘗戒武帝曰。宋氏若不骨肉相殘。他族豈得乘其衰敝。故終武帝世。諸兄弟尚得保全。然齊高但知宋之自相屠戮。而不知己之殺劉氏子孫之慘。當巴陵王子倫被害時。謂茹法亮曰。先朝殺滅劉氏。今日之事。理數固然。是天理即人心。殺人

子孫者。人亦殺其子孫。金翅下殿。博食小龍無數。子復傳。明帝名也。斯固齊高之自取也。然齊明之忍心害理。亦已至矣。建武中。凡三誅諸王。每一行事。帝輒先燒香。火。嗚咽流涕。人以此知其夜當有殺戮。子岳。每殺諸王。皆以夜遣兵圍宅。或斧斫關。排牆而入。齊當時高武子孫。朝不保夕。每朝見鞠躬俯僂。不敢正行直視。桂陽王鐸。見帝後。出謂人曰。吾前日見上流涕嗚咽。而鄱陽隨郡誅。今日又流涕而有愧色。其在吾耶。是夕果見殺。鐸宜都王鏗。咏陸機。弔魏武云。昔以四海為己任。死則以愛子託人。左右皆泣。未幾賜死。鏗王敬則起兵向闕。以奉南康王子恪為名。子恪逃走。不知所在。明帝欲盡殺高武子孫。乃悉召入尚書省。敕人各兩左右。自隨。孩抱者乳母隨入。其夜太醫煮藥。都水辦棺材數十具。須三更悉殺之。會子恪自吳奔歸。二更刺啟入。時刻已至。而帝眠未醒。沈徽孚單景儁少留其事。及帝覺。乃白子恪已至。帝驚曰。未盡諸王命耶。景儁具以事答。明日悉遣諸王侯還第。昭胄蓋天良難昧。帝亦動於心之所不安也。然其後又卒皆誅死。然則齊明之殘忍慘毒。無復人理。真禽獸之不若矣。卒之高武子孫既盡。而已之子東昏侯寶卷和帝寶融。皆被廢殺之禍。江夏王寶玄。先為東昏所殺。鄱陽王寶寅。逃入魏。後亦謀反誅。邵陵王寶攸。晉熙王寶嵩。桂陽王寶貞。皆中興元二年賜死。惟廣陵王寶

源以先卒。未被禍。巴陵王寶義。以廢疾得善終。餘皆早夭。是明帝之子。亦無一得免禍者。始安王遙光。明帝親兄子。明帝謀害諸王。皆遙光贊成。之後遙光亦以反誅。真所謂天理昭彰。報施不爽。凡殺人以利己者。可以觀於此矣。

齊制典籤之權太重

齊制諸王出鎮。其年小者。則置行事及典籤以佐之。一州政事。以及諸王之起居飲食。皆聽命焉。而典籤尤為切近。齊書孝武諸子傳。論謂帝子臨州。年皆幼小。故輔以上佐。簡自帝心。州國府第。先事後行。飲食起居。動應聞啟。行事執其權。典籤掣其肘。處地雖重。行已莫由。斯宋氏之餘風在齊而彌甚也。今見於列傳者。武陵王奕為丹陽尹。始不置行事。得自親政。僕隨郡王子隆督益州。始親府州事。子隆傳可見其始皆有行事。不得自專也。蔡約為宜都王長史。行府州事。時諸王行事。多相裁割。約在任主佐之間。穆如也。約傳可見行事如約者少也。劉暄為江夏王寶元郢州行事。執事過刻。有人獻馬。寶元欲看之。暄曰。馬何須看。妃索煮肫。暄曰。已煮鵝。不復煩。此寶元曰。舅殊無渭陽之情。江拓傳可見行事之威制也。此行事之弊也。其籤帥之權。如武陵王奕在江州。忤典籤趙渥。趙渥啟其得失。即召還京。奕宜都王傳王鏗舉動。每為籤帥所判。立意多不得行。鏗南海王子罕傳欲暫遊東堂。典籤姜秀

不許。還泣謂母曰。兒欲移五步不得。與囚何異。邵陵王子貞求熊白。厨人答以無典籤命。不敢與。西陽王子明欲送書侍讀鮑僎。典籤吳修之不許。乃止。俱見子其傳有不甘受制。而擅殺典籤者。則必治以專輒之罪。如長沙王晃為典籤所殺。晃殺之高帝大怒。手詔賜杖。晃傳魚復侯子響。為行事劉寅。典籤吳修之等所奏。武帝遣臺使檢校。子響憤殺寅。修之等。後以抗拒臺兵被誅。子響傳是以威行州郡。權重藩君。勢積重而難反。當子響之殺寅等也。武帝聞之曰。子響遂反。戴僧靜大言曰。諸王都應反。帝問故。對曰。諸王無罪。而一時被囚。取一挺藕。一杯漿。籤帥不在。則竟日忍渴。諸州但聞有籤帥。不聞有刺史。見子倫傳。而僧靜傳。武帝使僧靜往討。僧靜曰。王年少。長史捉之太急。愈不思難。故耳。天子兒過。誤殺人。有何大罪。而竟陵王子良嘗問范雲曰。士大夫何故詣籤帥。忽遣軍西上耶。僧靜不敢奉詔。雲曰。諸長史以下皆無益。請籤帥便有十倍之利。不請何為。子倫傳故明帝殺諸王。無一不就典籤殺之。其初輔政時。防制諸王。先致密旨於上佐。孔瑒傳又令蕭湛召諸王。典籤約不許。諸王外接人物。湛傳其害巴陵王子倫也。懼其有兵能拒命。以問典籤裴伯茂。伯茂曰。若遣兵恐不可。即得娶伯茂。則一小吏力耳。果以酖逼之死。子倫傳又遣裴叔業害南平王銳。防閤周伯玉欲斬叔業。舉兵匡社稷。典籤叱左右斬之。銳遂見害。裴積威之漸。一至於此。

按南史呂文顯傳。故事府州部內論事。皆用籤。前敘所論之事。後書某官某籤。故府州置典籤。掌之本五品吏耳。宋季多以幼小王子出為方鎮。人主皆以親近左右為典籤。一歲中還都者數四。人主輒問以刺史之賢否。往往出於其口。於是威行州郡。權重藩君。齊明帝知之。始制諸州論事。不得遣典籤。其任稍輕。其後仍復積重。梁書江革為廬陵王長史。時少王行事。多傾意於籤帥。革以正直自處。不與籤帥同坐。蓋以典籤本微賤者也。然官小而權重。革之為此。豈至梁時籤帥已輕。不復如齊時之威福在手耶。

南朝以射雉為獵

南朝都金陵。無蒐狩之地。故嘗以射雉為獵。宋明帝射雉。至日中無所得。甚慚。曰。吾旦來如皋。遂空行可笑。褚炫對曰。今節候雖適。而雲霧尚凝。故斯輩之禽。驕心未警。帝意解。乃於雉場置酒。宋書褚炫傳帝至巖山射雉。有一雉不肯入場。日暮將返。留晉平王休祜待之。令勿得雉。勿返。休祜便馳去。上令壽寂之等追之。蹶令墜馬。死。休祜傳齊武帝永明六年。郎鄆超諫射雉。上為之止。久之超竟誅。後又將射雉。竟陵王子良又諫止。齊紀東昏置雉場二百九十六處。翳中帷幃皆紅綠錦為之。有鷹犬隊主。翳隊主等官。

江左世族無功臣

六朝最重世族。已見叢考前編。其時有所謂舊門。次門。後門。勳門。役門之類。以士庶之別。為貴賤之分。積習相沿。遂成定制。陶侃微時。郎中令楊暉與之同乘。溫雅謂暉曰。奈何與小人同載。都鑿陷陳午。賊中有同邑人張寶。先附賊。來見竟卿鑿。鑿曰。相與邦壤。義不及通。何可怙亂至此。實慚而退。楊方在都。縉紳咸厚之。方自以地寒。不願留京。求補遠郡。乃出為高梁太守。王僧虔為吳興郡守。聽民何係。先等一百十家為舊門。遂為阮佃夫所劾。張敬兒斬桂陽王休範。以功高當乞鎮襄陽。齊高輔政。以敬兒人位本輕。不欲便處。以襄陽重鎮。侯景請婚王謝。梁武帝曰。王謝門高。可於朱張以下求之。一時風尚如此。即有出自寒微。奮立功業。官高位重。而其自視。猶不敢與世族較。陳顯達既貴。自以人微位重。每遷官。常有愧懼之色。誠諸子曰。我本志不及此。汝等勿以富貴驕人。又謂諸子曰。麈尾是王謝家物。汝不須捉。此王敬則與王儉同拜開府。褚淵戲儉以為連璧。儉曰。老子遂與韓非同傳。或以告敬則。敬則欣然曰。我本南沙小吏。今得與王衛軍同拜三公。復何恨。傳。王琳為梁元帝所忌。出為廣州刺史。琳私謂李膺曰。官正疑琳耳。琳分望有限。豈與官爭為帝乎。何不使琳鎮雍州。琳自放兵作田。為國捍禦外侮也。琳且不特

此也。齊高在宋，以平桂陽之功，加中領軍，猶固讓與袁粲褚淵。書自稱下官，常人志不及遠。傳諸淵及即位後，臨崩遺詔亦曰：「吾本布衣素族，念不到此。」紀可見當時門第之見，習為固然。雖帝王不能改易也。然江左諸帝，乃皆出自素族。宋武本丹徒京口里人，少時伐荻新洲，又嘗負刁逵社錢被執，其寒賤可知也。齊高既稱素族，則非高門可知也。梁武與齊高同族，亦非高門也。陳武初館於義興許氏，始仕為里司，再仕為油庫吏，其寒微亦可知也。其他立功立事，為國宣力者，亦皆出於寒人。如顧榮、下壺、毛寶、朱伺、朱序、劉牢之、劉毅等之於晉，檀道濟、朱齡石、沈田子、毛脩之、朱脩之、劉康祖、劉彥之、沈慶之等之於宋，王敬則、張敬兒、陳顯達、崔慧景等之於齊，陳伯之、陳慶之、蘭欽、曹景宗、張惠紹、昌義之王琳、杜龕等之於梁，周文育、侯安都、黃法甌、吳明徹等之於陳，皆禦武戡亂，為國家所倚賴，而所謂高門大族者，不過雍容令僕，裙屐相高，求如王導、謝安、柱石國家者，不一二數也。次則如王宏、王曇首、褚淵、王儉等，與時推遷，為興朝佐命，以自保其家世。雖朝市革易，而我之門第如故，以是為世家大族，迥異於庶姓而已。此江左風會習尚之極，故也。

梁武存齊室子孫

宋之於晉，齊之於宋，每當革易，輒取前代子孫盡殄之。梁武父順之在齊時，以縊

殺魚復侯子響事，為孝武所惡，不得志而死。故梁武贊齊明帝，除孝武子孫，以復

私讎。然亦本明帝意，非梁武能主之也。後其兄懿又為明帝子東昏侯所殺，故革

易時，亦盡誅明帝子以復之。所謂白雪門恥也。至於齊高子孫，猶有存者。高武子孫已為

明帝殺盡，惟豫章王一支尚留，則皆保全而錄用之。如蕭子恪，仕至吳郡太守，子範秘書監，子顯

侍中，吏部尚書，子雲國子祭酒，子暉中騎長史，梁武嘗謂子恪等曰：「我初平建康，

人皆勸我云：「時代革易，宜有處分。」我依此而行，有何不可。正以江左以來，代謝必

行誅戮，有傷和氣，所以運祚不長。昔曹志是魏武帝孫，陳思王之子，事晉武帝，能

為忠臣。此即卿事例。卿等無復自外之意，日久當知我心耳。」姚察論曰：「魏晉革易，

皆抑前代宗支，以絕民望。然劉奕、曹志，猶顯於新朝。及宋遂令司馬氏為廢姓，齊

之代，宋戚屬皆殲，其祚不長。抑亦由此。梁受命而子恪兄弟及羣從並隨才受任，

通貴滿朝。君子以是知高祖之量度越前代矣。」

陳武帝多用敵將

陳武帝起自寒微，數年有天下。其將帥自侯安都、黃法甌、胡穎、徐度、杜陵、吳明徹

諸人外，其餘功臣皆出於仇敵中者。杜僧明、周文育，則起兵圍廣州，為帝所擒者

也。歐陽頎亦事蕭勃，為周文育擒送於帝者也。侯瑱、周鐵虎、程靈洗，則王僧辨故

將也。魯悉達、孫瑒、周昊、樊毅、樊猛，則王琳故將也。或臨陣擒獲，或力屈來降，帝皆釋而用之。委以心膂，卒得其力，以成偏安之業。其度量恢廓，知人善任，固自有過人者。如侯瑱據豫章，自以本事僧辨，不肯入朝。及部眾叛散，或勸其投北齊。瑱以帝有大量，必能容人，乃詣闕歸罪。魯悉達據晉熙，王琳授以鎮北將軍，帝亦授以征西將軍。悉達兩受之，而皆不就。帝使沈泰潛師襲之，亦不克。後為北齊師所破，乃來歸。武帝謂曰：「來何遲也？」對曰：「陛下授臣以官，恩至厚矣。使沈泰來襲，威亦深矣。臣所以自歸者，以陛下豁達大度，同符漢祖故也。」帝曰：「卿言得之矣。」可見帝之度量。當時早有以見信於人，故能驅策羣雄，藉以集事。魏鄭公史論謂：「帝志度宏遠，懷抱豁如，或取士於仇讎，或擢才於亡命，掩其受金之過，宥其吠堯之罪，委以心腹爪牙，咸得其死力。」方諸鼎峙之雄，足以無慚權備矣。然則雖偏安江左，固亦有帝王之度量哉。

齊梁臺使之害

齊書竟陵王子良傳：宋元嘉中，簿書賦稅皆責成郡縣。孝武帝急速，乃遣臺使。自此公私勞擾。齊初子良疏曰：「此輩使人，既非詳慎，或貪險崎嶇，營求此役，朝辭禁門，形態即異。暮宿村縣，威福便行。脅過津吏，恐唱郵傳。既望城郭，便飛下嚴符。但

稱行臺，未知所督。先詔官吏，卻攝羣曹。絳標寸紙，一日數至。四鄉所召，莫辨枉直。萬姓駭迫，爭致餽遺。今日酒諧肉飲，即許附申。明日禮輕貨薄，復責科算。及其狃蒜轉積，鵝粟漸盈，遠則分鬻他境，近則託質吏民。反請郡邑，助民祈緩。此齊室臺使之害也。梁書賀琛傳：亦有疏曰：「今東境戶口空虛，皆由使命繁數。大邦大縣，舟船銜命者，非惟十數，即窮幽之鄉，極遠之邑，亦皆必至。鴛困邑宰，則拱手聽其漁獵。桀黠長吏，又因之而為貪殘。故細民棄業流冗者多。此梁室臺使之弊也。以田租丁賦，動遣臺使分催，本非政體。此輩假公營私，騷及雞犬，固事之所必有也。然如子良所云，狃蒜鵝粟之類，則徵索尚屬微細。後世固不至以簿書賦役動遣使徵求。然有時以重案，特命大官出勘，名曰欽差。其中未嘗無公正之人，能廉潔持身。平反定獄，然不可多得也。不肖者，則因以為利，藉權索賄，動至數萬金。小民之受累猶少。官府之被禍已深。前明劉瑾竊柄時，科道出使歸例，以千金為餽。猶覺其細已甚也。何況齊梁臺使，僅索雞豚果粟之類，固不足數矣。夫外吏不可信，而遣朝官小官不可信，而遣大僚，宜其勵官方而達民隱，乃滋累更甚，則不如不遣之為愈也。」

後漢桓帝數遣黃門常侍及中使伯榮往來甘陵。伯榮尤驕蹇，所經郡國莫不

迎送禮謁。陳忠上言。使者所過。威權翕赫。震動郡縣。王侯二千石。為伯榮獨拜車下。儀體上僭。侔於人主。長吏懼責。發人修道。繕理亭傳。徵役無度。老幼相隨。動以萬計。賂遺僕從。人數百匹。頓踣呼嗟。莫不叩心。後代欽差之弊。往往類此。六朝多以反語作讖。

自反切之學興。遂有以反語作讖者。三國志諸葛恪未被害時。民間謠曰。諸葛恪。蘆葦單衣。箴鉤落。於何相逢。成子閣。反語石子岡也。後恪為孫峻所殺。投尸於石子岡。晉書孝武紀。帝為清暑殿。識者謂清暑反語為楚聲。哀楚之徵也。齊書益州向無諸王作鎮。宋時有邵碩曰。後有王勝意來作此州。及齊武帝以始興王鑑為益州刺史。勝意反語為始興也。碩言果驗。又文惠太子啟武帝。乞東田作小苑。東田反語為顛童。後其子鬱林王即位。果以童昏見廢。梁書武帝創同泰寺。後又創大通門。以對寺之南。取反語以協同泰也。遂改年號為大通。以符寺及門名。昭明太子時有謠曰。鹿子開城門。城門開鹿子。鹿子開者。反語謂來子哭。時太子之長子歡為南徐州刺史。太子薨。乃遣人追歡來臨喪。故曰來子哭也。

哀策文

周制飾終之典。以諡誄為重。漢景帝始增哀策。漢書本紀中二年。令諸侯王薨。大

鴻臚奏諡誄策。列侯薨。大行奏諡誄策。應劭注。謂賜諡及誄文。哀策也。沿及晉宋。猶以諡誄為重。魏志郭后傳。裴松之注。后崩有哀策文。晉書文明王皇后傳。武帝時。后為皇太后。既崩。帝手疏后德行。命史官為哀策文。及帝楊后崩。亦命史官作哀策。其文俱載本傳。愍懷太子為賈后所害。後追復皇太子。特為哀策文。又江統陸機並作誄頌焉。李允卒。皇太子命王贊誄之。其文甚美。王珣傳。孝武帝崩。哀策諡議。皆珣所草。宋文帝袁皇后薨。詔顏延之為哀策文。甚麗。帝自增撫存悼亡。感今懷昔八字。孝武殷嬪薨。命謝莊為誄文。都下傳寫。紙為之貴。至齊則專重哀策文。齊武裝后薨。羣臣議立石誌。王儉曰。石誌不出禮經。今既有哀策。不煩石誌。乃止。可見齊以後。專以哀策為重也。今見於齊梁書。各列傳者。梁武丁貴嬪薨。張纘為哀策文。昭明太子薨。王筠為哀策文。簡文為侯景所制。其后薨。蕭子範為哀策文。簡文讀之曰。今葬禮雖缺。此文猶不減於舊是也。唐代宗獨孤后薨。命宰相常克為哀策。猶沿此制。

南朝陳地最小

晉南渡後。南北分裂。南朝之地。惟晉末宋初最大。至陳則極小矣。劉裕相晉。滅慕容超。而復青齊。降姚泓。而復洛陽。滅姚泓。而復關中。其後關中雖為赫連勃勃所

奪而沂河西上。時遣王仲德在北岸陸行。魏將尉建棄滑臺。仲德入據之。自後魏屢攻得而復失。魏明元帝欲南伐。崔浩謂當略地以淮為限。則滑臺虎牢。反在我軍之北。是滑臺虎牢。尚為宋地。宋將到彥之王仲德攻河南。明元帝遣長孫道生等追擊。至歷城而還。是歷城亦宋地也。宋元嘉十九年。詔闕里往經寇亂。應下魯郡。修復學舍。是魯郡亦宋地也。直至魏太武帝。遣安頡攻拔洛陽。剋虎牢。剋滑臺。帝臨江起行宮於瓜步。宋魏百宰。乃班師。於是河南之地多入魏。魏孝文帝時。宋薛安都以彭城。畢眾敬以克州。常珍奇以懸瓠。俱屬於魏。張永沈攸之與魏戰。又大敗。於是宋遂失淮北四州。及豫州淮南地。其後齊將裴叔業。又以壽春降魏。於是淮北之地亦盡入於魏。故蕭齊北境已小於宋。迨梁武帝使張紹惠取宿豫。蕭容取梁城。韋叡取合肥。以及義陽邵陽之戰。浮山堰之築。兩國交兵。爭治淮之地者十餘年。互相勝負。魏孝明帝時。元法僧以徐州降梁。梁武遣蕭綜守之。綜仍以徐州降魏。魏末爾朱榮之亂。北海王顥奔梁。梁立為魏主。使陳慶之送之歸國。深入千里。孝莊帝北走。顥遂入洛。梁之勢幾振。其後顥戰敗被擒。魏仍復所失地。而梁之地尚無恙也。及侯景之亂。西魏寇安陸。執司州刺史柳仲禮。盡沒漢東之地。其淮陽山陽淮陰等地俱降東魏。鄱陽王範又以合州降東魏。東魏遂盡有淮南

之地。景又攻陷廣陵。使郭元建守之。景敗。元建以廣陵降北齊。時東魏孝靜帝已於是江北亦為北齊所有。是時蕭繹在江陵。乞師於西魏。令蕭循以南鄭與西魏西魏遂取漢中。繹稱帝於江陵。武陵王紀自成都起兵伐之。西魏使尉遲迴攻成都以救繹。及紀為繹所殺而迴亦取成都。於是蜀地盡入於西魏矣。是時梁之境自巴陵至建康。惟以長江為限。荆州界北盡武甯。西拒峽口。而岳陽王蕭譽。以繹殺其兄譽。遂據襄陽降西魏。西魏遣于謹等伐江陵。克之。殺元帝。即乃以江陵易襄陽。使譽為梁主。而襄陽亦入於西魏矣。元帝歿後。王僧辨陳霸先立其子方智於建業。北齊文宣納蕭淵明入為梁主。陳霸先廢殺之。仍奉方智。其時徐嗣徽任約降北齊。方據石頭城。文宣又遣蕭軌柳達摩東方老等來鎮石頭。為霸先所擒。殺金陵之地。得以不陷。計是時江以北盡入於北齊。西境則蜀中及襄陽俱入西魏。江陵又為蕭譽所有。梁地更小於元帝時矣。陳霸先篡位。是為陳武帝。因之以立國。其城之入於周者。西魏恭帝。惟湘州在江之南。周將賀若敦獨孤盛不能守。全師北歸。地歸於陳。其後周陳通好。陳又賂周以黔中地及魯山郡。迨北齊後主荒縱。陳宣帝乘其國亂。使吳明徹取江北。大敗齊師於呂梁。又攻殺王琳於壽陽。於是淮泗之地俱復。而是時周已滅齊。宣帝欲乘亂爭徐兗。又使明徹北伐。至彭城反。

為周師所敗。明徹被擒。於是周章孝寬復取壽陽。梁士彥復拔廣陵。陳仍畫江為界。江北之地盡入於周。故隋承周之地。晉王廣由江都至六合。韓擒虎自廬州直渡采石。賀若弼自揚州直造京口。遂以亡陳也。

按三國時孫吳之地。初只江東六郡。漸及閩粵。後取荊州。始有江陵。長沙。武陵。桂陽等地。而夔府以西。尚屬蜀也。其江北之地。亦只有濡須。鳩。於。其。餘。則皆屬魏。陳地略與之相似。而荊州舊統內。江陵又為後梁所占。是其地又小於孫吳時。

廿二史劄記卷十二

廿二史劄記卷十三

陽湖趙翼撰

魏書多曲筆

魏收仕於北齊。修史正在齊文宣時。高故凡涉齊神武。高在魏朝時事。必曲為迴護。如孝莊紀。建義元年。書齊獻武王。高與于暉等大破羊侃於瑕丘。北史二年。書齊獻武王與上黨王天穆大破邢杲於濟南。杲降。送京斬於都市。北史前廢帝紀。普泰元年。書齊獻武王以爾朱榮逆亂。興義於信都。北史又爾朱榮傳內。書河陰之役。榮欲篡立。齊獻武王及司馬子如勸止之。乃仍奉莊帝。北史謂劉靈助勸等。此皆深著齊神武之功也。孝武西遷。為西魏。神武立。孝靜帝為東魏。則於西魏之君臣。率多貶詞。孝武之殂。則書宇文黑獺。即宇文泰既害出帝。即孝武帝乃以南陽王寶炬僭尊號。即文斛斯椿隨入關。北史載其死後。家無餘貲。而魏收書則謂其狡獪多事。好亂樂禍。朝野莫不疾之。賀拔勝自魏奔梁。又自梁歸西魏。感梁武之德。見鳥之南飛者。亦不忍射。玉璧之戰。追逐齊神武。幾獲之。北史謂其垂翅江左。憂魏室之危亡。奮翼關西。感梁朝之顧遇。是固君子人也。魏收書則謂其好行小數。志大膽薄。周章南北。終無所成。致沒於賊中。此皆以其仕於西魏。故肆為詆訾。當時

已謂其黨齊毀魏。衰貶肆情。則其曲筆可知也。至孝靜帝紀。歷敘高澄無禮於帝。及帝遜位於齊。文宣時。與宮嬪泣別。乘一犢車而去。後文宣行幸。常以帝自隨。竟遇醜而崩等語。按魏收修書。正在文宣時。方諂齊之不暇。豈敢直書其事。此必非收原本。乃後人取北史之文以足之。惟后妃傳內。孝靜帝后高氏。本神武之女。文宣妹也。而書帝崩後。下嫁楊遵彥。亦似略無忌諱。故叢考前編。謂非收原本。今細按之。正見收之諂附。遵彥欲以見其聯姻帝室之榮。則此傳實係收書。非鈔北史之文也。遵彥楊愔字也。史家書名不書字。今獨書其字。尤見其諂情。而不敢書名也。然則收之書。趨附避諱。是非不公。真所謂穢史也。

孝武帝與高歡不協。而西遷既入關。因閨門無禮。為宇文泰所醜。魏收在齊修魏書。宜乎詳著其醜。乃出帝紀。武帝即孝武帝並不敘及。但云帝為宇文黑獺所害。是猶存諱惡之義。或收修書時。孝武閨門之事。尚未聞於齊故耶。

魏書紀傳互異處

魏書道武宣穆皇后傳。明元帝之母劉貴人魏故事後宮產子。將為儲貳。其母皆賜死。故后以舊法薨。然考紀傳。道武以前。未有此事。明元本紀載道武將立明元為太子。召而告之曰。昔漢武將立其子而殺其母。不令婦人與國政也。汝當繼統。故吾遠同

漢武。於是劉貴人死。明元悲不自勝。據此。則立子先殺其母之例。實自道武始也。遍檢魏書。道武以前。實無此例。而傳何以云魏故事耶。北史亦同此誤。

爾朱榮傳

北史魏諸臣傳。多與魏收書相同。惟爾朱榮傳。當時謂榮子文暘遺收金。請為其父作佳傳。收論內。遂有若修德義之風。則韋彭伊霍。夫何足數等語。故北史此傳。多有改訂。今按收書。大概著其功而減其惡。先敘其討破萬子乞真。向番和婆喻。嶮。向乞步落堅。胡劉阿如。向敕勒。北列步若。向勒勤。斛律洛陽。向費也頭。牧子等。詳悉不遺。至葛榮作亂。則載其請討一疏。明帝之殂。則載其請誅徐紇。鄭儼一疏。立莊帝後。載帝加以柱國大將軍一詔。擒葛榮後。載帝加以大丞相一詔。又進位太師一詔。平元顥後。載帝加以天柱大將軍一詔。及榮死後。又載廢帝追贈三詔。而於榮肆橫無君。逞凶濫殺。及莊帝畏逼憂禍。潛謀殺榮之事。則不甚詳。使閱者但覺功多罪少。此收之舞文也。北史則於討破萬子乞真等小賊。不過彙括數語。其疏與詔。一切刪除。此本北史體例。如榮傳。而河陰之殺朝臣。北史謂二千餘人。及莊帝殺榮之事。詳敘之。歷歷如繪。自是功罪各不相掩。然收書河陰之役。榮殺帝兄弟。並幽帝於別帳。將弑之。已使趙元則作禪文。因鑄己象不成。乃還奉莊帝之處。

亦終不能稍諱。則亦未大失實也。惟榮女先為明帝嬪。榮欲以為莊帝后。帝從祖瑩言立之。此事榮傳中竟絕無一字。則以此后後為齊神武所納。故諱之。然則收非曲徇爾朱。乃曲徇高氏耳。

西魏書

魏自胡太后臨朝。孝明帝崩後。爾朱榮起兵。沈太后少帝於河。立長樂王子攸。是為孝莊帝。帝以榮肆橫。手殺之。爾朱兆等稱兵害帝。立長廣王奕。又以奕詔禪位於廣陵王恭。是為節閔帝。魏書謂前廢帝高歡起兵討爾朱氏。廢節閔而立平陽王修。是為孝武帝。未幾帝與歡不協。乃西遷關中。依宇文泰。歡別立清河王亶子善見為帝。是為東魏。而孝武為西魏。按歡廢節閔時。會朝臣議。僉謂孝文不可無後。故立孝武。天下共以為主。已三年始西遷。是魏統自應屬孝武。孝武崩。文帝立。文帝崩。廢帝恭帝繼之。皆魏之正統也。魏收在北齊修魏書。欲以齊繼魏為正統。故自孝武後。即以東魏孝靜帝繼之。而孝武後諸弟不復作紀。此收之私見也。魏儋作魏書。以西魏為正統。自是正論。惜其書不傳。故西魏文帝等紀年紀事。轉見於周文帝即宇文泰紀內。幸北史增文帝諸紀名分始正。而魏書究不得為完書。近日謝蘊山藩伯另撰西魏書。以次于魏書之後。誠得史裁之正也。其採掇亦甚詳。可稱良史。

惟列傳尚有遺漏。如八柱國內。少李弼。獨孤信。趙貴。侯莫陳崇。十二大將軍內。少侯莫陳順。宇文遵。達奚武。李遠。豆盧寧。宇文貴。楊忠。王雄。按柱國本爾朱榮官號。榮貶後。此官遂廢。魏文帝以宇文泰功大。始命為之。其後功參佐命。望實俱重者。亦居此職。自大統十六年以前。任者凡八人。泰統百揆。元欣皇族。其餘六人。各督二大將軍。分掌禁旅。出則征伐。是諸臣乃大統十六年以前功臣。雖皆宇文泰擢用。然是時魏祚未移。泰亦尚為魏臣。諸人方與泰比肩事魏。則皆西魏臣也。豈得無傳。又蘇綽在魏。仿周禮定官制。與盧辯同事。今綽有傳。而辯無傳。亦屬掛漏。曾屬蘊山補之。未知增入否。

附謝蘊山荅書

前過常州。快聆塵論。得慰積懷。昨惠手書。過蒙期許。拙詩復寵以序文。感何如之。承示西魏書掛漏處。極費清心。所有宗室內。少元育。元贊。八柱國內。少李弼。獨孤信等。十二大將軍內。少侯莫陳順等。誠屬疏略。然斷代為書。列傳當有限制。嘗怪漢之臧洪。陶謙。荀彧。公孫瓚。董卓。二袁諸人。皆未入魏志。陳壽載之。魏志殊失史裁。范蔚宗收入後漢書。是也。然黃初諸臣。曾仕建安者甚多。使俱入漢書。則無此義例矣。弟為此書之初。搜羅周隋兩朝之曾任西魏者。凡三百餘人。周書列傳。非西

魏臣者十無一二。勢難廢周書而改為西魏。故拙撰列傳。以宇文受禪為斷。其下仕周隋者。即不立傳。雖尉遲迴。獨孤信輩。勳業爛然。亦從刪削。然封爵表載其爵秩大事。異域表載其勳略。柱國大將軍之制。載於百官考。似可與列傳互為補苴。不致缺漏矣。此區區作書之旨。不識高明以為然否。大抵吾輩著書。得失參半。一人見識既單。精力有限。不得良友正之。則疑無從改訂。尚祈不吝教言。尤荷高誼。吾兄近日著述。如已脫稿。亦望寄示。或可效一得之愚也。諸惟鑒原是幸。

荅謝蘊山藩伯書

承示西魏書斷。自宇文受禪。而以僕所指八柱國十二大將軍。有不能盡入西魏者。具見斟酌苦心。僕深愧考核未精。妄參末議矣。漢以後數朝。皆以禪代為革命。其臣多歷仕前後兩朝。故作史者。必先立限斷。晉武帝議立晉書限斷。荀勗欲以魏正始為斷。王瓚欲以嘉平為斷。賈謚欲以泰始為斷。後因張華謂宜用正始。其議遂定。徐爰宋書舊本。列晉末諸臣及叛賊。並劉毅等。與宋武同起義者。沈約修宋書。以桓元焦縱。盧循。身為晉賊。無關後代。吳隱。郝僧施。義止前朝。不宜入宋。劉毅。何無忌。諸葛長民。魏詠之。志在匡晉。亦非宋臣。遂一概刪卻。此皆古人先立限斷之法。足下西魏書。以宇文受禪為斷。可謂扼要矣。然亦有未可盡拘者。

陳壽魏志。列入漢末諸臣。董卓。陶謙。呂布。二袁。劉表等。誠有如足下所云。殊失史裁。然壽作三國志時。後漢尚未有正史。而諸臣事多與曹操相涉。不立傳則記載不明。故仿史記項羽陳涉之例。遂列漢臣于魏志。及范蔚宗出。悉收入後漢書。而後漢魏兩朝人物。燦若列眉。足下西魏書。列斛斯椿。賈顯度。賀拔勝等傳。正用范書例也。而范書中有荀彧一傳。或出仕即參曹操軍事。始終為其謀主。佐成大業。則聽其傳于魏志可矣。而蔚宗以其心存漢朝。阻魏九錫。特入於漢臣內。此又作史者于限斷之中。寓變通之例。今西魏八柱國十二大將軍。雖多宇文泰擢用。其後又多仕于周者。然其先則與秦同官魏朝。且秦于魏文帝時。尚不失臣節。其出師。嘗奉魏帝以行。所仿周禮六官。亦必奏而後著為令。非如操之目無漢獻也。則與秦同立功于西魏者。尚皆魏臣。況李弼。侯莫陳順。當周閔帝受禪之年。即卒。趙貴。獨孤信。並以謀殺宇文護而被害。似不得盡指為周臣。而西魏書不列傳也。如以仕周者。不終于魏。則有新唐書傳趙光允。王處直之例。在二人皆唐臣。後歷仕朱梁。後唐。而新唐書仍為立傳。光允則敘其歷官知制誥而止。處直則敘其天復初封太原郡王而止。以此官猶是唐所授。以後則不復敘也。否則有隋唐二書。各傳裴矩之例。在矩入唐為民部尚書。唐人修隋書。以其在隋朝事蹟最多。特為立

書較為詳備。及書成則盡焚崔李等舊書。於是收書獨存。而魏澹續修亦僅能改其義例之不當者。而年月件繫事實則固不能舍收書而別有所取也。是知澹書已悉本收書。延壽又在澹後。自不得不以收書為本。故敘事大略相同也。

按孝明帝之崩。本胡太后倖臣鄭儼徐紇所為。魏收書及北史本紀皆不見其迹。但云武泰元年二月癸巳。帝崩於顯陽殿而已。是北史例亦不畫一。又晉書苻堅載記。堅遣俱難鄧羗等討涉翼捷。即魏書什翼犍涉翼捷戰敗。遁于陰山。其子翼珪縛父以降。堅以涉翼捷荒俗。未知禮義。令入太學習禮。以翼珪執父不孝。遷於蜀。此事魏收書本紀既不載。北史亦不書。

北史改編各傳

北史編次各傳多有與正史異者。魏齊隋俱有外戚傳。北史以魏之劉羅辰李峻于勁李延寶齊之婁叡爾朱文暘鄭仲禮李祖昇元蠻隋之獨孤羅蕭歸各附其家傳。惟魏之賀訥姚黃眉杜超賀迷閔毘馮熙李惠高肇胡國珍齊之趙猛胡長仁入外戚傳。周書無魏書文苑傳有袁躍裴敬憲盧觀封肅邢臧裴伯茂邢昕溫子昇。北史惟取子昇。其餘各附其家傳。齊書文苑傳有祖鴻勳李廣樊遜劉述荀士遜顏之推。北史惟取祖李樊荀。其餘亦各附其家傳。周書無文苑傳。北史取王

褒庾信。顏之推及弟之儀。之推本在北齊文苑內。後隋書文學傳有劉臻崔儼王頴諸葛穎王貞孫萬壽虞綽王胄庾自直潘徽北史則取劉臻諸葛穎王貞虞綽王胄庾自直潘徽又增虞世基許善心柳詵明克讓為文苑傳。而崔儼王頴孫萬壽各從其家傳。魏書有孝感傳。趙談長孫慮乞伏保孫益德董洛生楊引閻允明吳悉達王績生李顯達倉跋張昇王崇郭文恭也。周書有孝義傳。李崇柳檜杜叔毘荆可秦族皇甫遐張元也。隋書有孝義傳。陸彥師田德懋薛濬王頊田翼楊慶郭世俊紐因劉仕儁郎方貴翟普林李德鏡華秋徐孝肅也。北史則以趙談李崇柳檜杜叔毘陸彥師李德鏡入別傳及家傳。其餘作孝行傳。魏書藝術傳。晁崇張勝殷紹王早耿元劉靈助江式周澹李修徐謩王顯崔或蔣少游也。齊書方技傳。由吾道榮王春信都芳宋景業許遵吳遵世趙輔和皇甫玉解法選魏寧綦母懷文張子信馬嗣明也。周書藝術傳。莫儁蔣昇姚僧坦黎景熙趙文深褚該強練也。隋書藝術傳。庾季才盧大翼耿詢韋鼎來和蕭吉張胃元許智藏萬寶常也。北史則以江式崔或莫儁黎景熙趙文深各編列傳。又增沙門靈遠李順興檀特師顏惡頭並以陸法和徐之才何稠共為藝術傳。其餘入別傳及家傳。魏書酷吏傳。于洛侯胡泥李洪之高遵張赦提羊祉崔暹酈道元谷楷也。齊書酷吏傳。邱珍宋游

道盧斐畢義雲也。周書酷吏傳王文同也。北史則以高遵、羊祉、酈道元、谷楷、宋游道、盧斐、畢義雲各從其家傳，其餘入酷吏傳。

北史全用隋書

北史於魏齊周正史間有改訂之處，惟於隋則全用隋書，略為刪節，並無改正。且多有迴護之處，如隋文帝之篡，隋書本紀既循照歷代國史舊式，敘九錫文、禪位詔，並帝三讓乃受，絕不見攘奪之迹矣。北史亦一一照本抄騰，略無一語差異。祇刪去九錫文，以省繁冗而已。文帝殺宇文諸王，周書謂諸王皆以謀執政被害，而北史則第書誅陳王純、誅代王達、誅滕王逌，一似有罪而伏法者。帝即位後，封靜帝為介國公，年方九歲，開皇元年殂。周書謂隋志也，而北史但書介國公薨，上舉哀於朝堂，諡曰周靜帝，一似善終，而加以恩禮者。其於文帝之崩，書帝疾甚，與百僚辭訣，握手歎歔，崩於大寶殿，又載遺詔一篇，有惡子孫已為百姓除去，今嗣位者乃好子孫等語，一似憑几末命，壽考令終，並非遭害者。煬帝紀亦但書高祖崩，上即位於仁壽宮，而煬帝使張衡侍疾致斃，及矯詔即位之事，絕不見形迹。即張衡傳亦不著其弒逆，但載其賜死時，自言我為人作何事，而望久活，監刑者塞耳促殺之而已。惟於宣華夫人傳，文帝以太子廣無禮於夫人，速召故太子勇，楊素急

以白太子廣，廣遂令張衡入寢殿，令夫人及後宮侍疾者皆出，俄而帝崩。此則略露端倪於隱約之間，然亦未嘗直書也。隋書書法承歷代相沿舊例，尚不足怪。李延壽自作私史，正當據事直書，垂於後世，何必有所瞻徇，乃忌諱如此。豈於隋獨有所黨附耶。抑隋書本延壽奉詔所修，其書法已如此，故不便岐互耶。然正史隱諱者，賴有私史，若依樣胡盧，略無別白，則亦何貴於自成一家言也。

南北史兩國交兵不詳載

南北史以簡淨為主，大概就各朝正史刪十之三四。如每代革易之際，以禪讓為篡奪者，必有九錫文、三讓表、禪位詔冊、陳陳相因，遂成一定格式。南北史則刪之，而僅存一二詔策，其他列傳內，文詞無關輕重者，亦多裁汰。如許善心、神崔賦、隋書全載原文，北史但記其事，而不載其賦，如此類者不一而足。宋子京所謂刊落釀詞，過舊書遠甚者也。其於南北交兵事，尤多刪削。今即以北史與魏史校對，如魏書明元帝泰常七年，魏攻滑臺，宋將王景度棄城走，八年克虎牢，獲宋將毛德祖等。此事在宋少帝景平元年，宋書書魏軍克虎牢，武帝神龜元年，宋將王仲德寇濟陽，王元謨、竺靈秀寇滎陽，魏兵擊破之，四年安頡平滑臺，擒宋將朱修之、李元德等，追檀道濟至歷城而還。復為索虜所陷，檀道濟引兵還。太平真君四年，

皮豹子等破宋兵於濁水。七年永昌王仁擒宋將王章於高平。十一年仁斬宋將劉坦之於汝東。宋將蕭斌之寇濟州。王買德棄城走。斌之入城。遣王元謨寇滑臺。帝南代遣長孫真率騎五千赴之。元謨斌之皆遁。乃命諸將並進。宋將臧盾拒守。燕王譚破其援兵胡崇之。永昌王又攻拔懸瓠。車駕至淮。斬宋將唐德祖。遂至瓜步。宋人大懼。獻百牢。請進女皇孫以求和。帝以師婚非禮。許和而不許婚。北史俱不書。但云帝南征。命諸將分道並進。所至城邑皆下。起行宮於瓜步。宋文帝遣使進百牢。並請進女帝。許和而不許婚。又如孝文帝太和四年。齊將崔文仲陷壽春。崔暹景寇武興。魏詔元嘉等南討。破齊將盧紹之於朐山。又詔馮熙等出正陽。賀羅出鍾離。諸將擊破齊將桓康於淮陽。俘三萬餘人。北史亦不詳載。但云元嘉破齊軍。俘三萬口。十三年齊將陳顯達陷醴陽。左僕射穆亮討之。十五年齊兵寇淮陽。太守王僧雋擊走之。二十一年。帝留諸將攻赭陽。自至宛城。剋其郭。至新野。築長圍困之。大破齊將於沔北。二十二年。齊將蔡道福成。公期胡松等。各棄地遁走。又攻宛城。拔之。其將房伯玉出降。齊將裴叔業寇渦陽。詔鄭思明救之。二十三年。齊將陳顯達寇潁州。詔元英討之。顯達陷馬園。車駕南伐。顯達遁走。北史皆不書。宣武帝正始元年。梁將姜慶真陷壽春外郭。州兵擊走之。統軍劉思祖大破梁兵。

於邵陽。擒其將趙景悅等。元英又破梁將王僧炳於樊城。又破梁將馬仙琕於義陽。拔之。北史皆不書。但書破馬仙琕一事而已。二年。邢巒擒梁將范始男等。王足斬梁將王明達等。薛真度又破梁將王超宗等。北史俱不書。但云頻大破之。是年又詔中山王英南討襄陽。三年。梁將王茂先寇荊州。詔楊大眼討之。斬其將王花等。茂先遁。追至漢水。拔其王城。梁將張惠紹陷宿豫。韋叡陷合肥。詔尚書元暹南討。奚康生破張惠紹。斬其將宋黑。中山王英破其將王伯敖。邢巒破其將桓和於孤山。諸將別克固城。蒙山。兗州平。邢巒敗梁兵於宿豫。張惠紹棄宿豫。蕭昞棄淮陽。南走。徐州平。中山王英大破梁軍於淮南。梁臨川王宏等棄淮東走。遂攻鍾離。四年。鍾離大水。英敗績而回。北史皆不書。但書命中山王英南討。破梁將王伯敖。及圍鍾離。因大水敗回而已。淮陽之役。臨川王宏大兵逃回。實兩國大事。乃亦不書。蓋延壽敘事。專以簡括為主。固不能一一詳書。且南北交兵。各自誇勝。諱敗。國史固各記其所記。延壽則合南北皆出其一手。惟恐照本鈔謄。一經核對。則事迹多不相符。故也。即如齊神武紀。神武圍玉壁。思政於玉壁。欲以致敵。西師不敢出。乃班師。而周文紀謂周文聞齊神武至玉壁。乃出軍蒲坂。神武即退。是西師未嘗不敢出也。芒山之戰。齊紀謂神武大敗。周文俘斬六萬。會有軍士奔西軍。告以神武。

所在西軍盡銳來攻神武幾為賀拔勝所獲僅而免是東軍先勝而後敗也周紀則云齊神武陣芒山數日不進周文率軍夜登山未明而擊之神武為賀拔勝所逐僅免而趙貴等五軍居右戰不利齊神武合軍再戰周文又不利是西魏軍亦先勝後敗兩紀相校則周紀少敘先為東軍所敗一似齊紀又少敘再戰而敗西軍一節致不相合且齊神武奔脫後合兵再戰周文不利之處應敘於齊紀以誇勝乃反敘於周紀而齊紀不書此戰之後齊紀謂神武遣劉豐徇地至宏農而還周紀謂齊神武自至陝達奚武禦之乃退亦不相符可見作史之難兩國交涉處一經校對輒多罅隙宜乎延壽之不敢詳書也按北史大略亦有不明處如魏宣武帝景明年齊將陳伯之寇淮南是伯之方為齊攻魏也忽於正始三年書陳伯之自梁城南奔一伯之也何以忽南忽北魏書則景明三年書伯之來降正始元年伯之破梁將趙祖悅及昌義之三月伯之自梁城南奔則先其降北而又奔南較為明析北史不書其降魏一節殊無來歷若以伯之降魏事小故不書然正始元年梁將夏侯道遷據漢中來降何也

北史與魏齊周隋書歧互處

北史與魏齊周隋各史比對大略相同間有小異處今為摘出魏書神元帝遣子文帝沙漢如魏是歲魏景元二年也北史則謂遣文帝如晉是歲晉景元二年也按景元尚是魏陳留王年號魏書以屬魏從其名也是時權已在晉北史以屬晉

從其實也魏書凡宗室皆係以元姓如元觚元儀元題之類是也按拓跋之改姓元乃孝文帝時事道武以來固未嘗有此乃以後來所改之姓追敘於未改之前殊屬倒裝北史則書秦王觚東平公儀襄城公題較為得實爾朱榮河陰之殺朝士魏書謂責百官以明帝被害之故北史謂榮妄言高陽王雍欲反故殺之周書楊忠傳忠從獨孤信破穰城居半年以東魏之逼與信俱奔梁後從梁歸關中周文召居帳內是奔梁後方歸西魏也北史云東魏之逼忠與信俱歸關中周文召居帳下則刪卻奔梁一節未免過求簡淨之失其他與正史稍有歧互者魏孝文南伐魏書步騎百餘萬北史作三十餘萬齊文宣逼魏孝靜帝禪位魏書有襄城王旭入奏請靜帝法堯禪舜北史作襄城王景西魏克南鄭周書謂梁蕭循降北史作蕭修周書文帝紀有沃野賊衛可孤北史作魏可瓌宏農之戰周書謂斬東魏將李徽伯北史謂擒李徽伯此皆稍有差異之處延壽自序謂正史外又勘究雜史十餘卷故有此改訂也

北史書法與周隋書不同處

周書文帝紀內魏大統十二年齊神武圍玉壁不克以疾班師十三年春遂殂十五年侯景弒梁武帝十六年齊文宣廢魏孝靜而自立北史周紀皆不書以是時

周文帝尚為魏臣。諸事皆書於魏史。故也。隋書文帝紀專敘文帝事。而其父忠立功於周室之處。不敘以周書已立忠傳也。北史則於周代不立忠傳。而以忠事敘於隋文紀內。周書文帝孝閔帝明帝三本紀各為一論。北史則三帝合為一論。而論詞仍櫟括周書三論用之。周書武帝宣帝靜帝紀各為一論。北史亦櫟括其語為一論。至如隋文帝煬帝恭帝紀論。則全用隋書。一字不易。惟文帝論開首龍德在田。奇表見異八字。換以樹基立本。積德累仁耳。然隋文以詭詐讓位。有何積德累仁耶。

北史紀傳互異處

隋書文帝本紀。周五王謀隋文帝。帝以酒有造趙王招。觀其指趣。王伏甲於卧內。賴元胄以免。是文帝知招欲謀害。故以酒有赴之。以觀其意也。元胄傳則云招欲害帝。帝不之知。乃將酒肴詣其宅。則已與紀異矣。周書趙王招傳云。招邀隋文帝至第。飲於寢室。則又非隋文之以酒有赴之也。周隋書各記所記。故不同如此。北史則延壽一手所成。乃此等處全鈔舊文。初不檢點。遂亦岐互。

大業十四年

隋煬帝江都之難。在大業十四年。而隋書及北史。只書十三年者。緣十三年唐高

祖起兵入長安。奉代王侑為帝。改元義寧。而煬帝大業之號。已從削除。修史者皆

唐臣。自應遵本朝之制。以義寧紀年。而煬帝之被弒。轉書於義寧二年之內。其實

天下共主。一日尚存。終當稱其年號。則大業十四年不可沒也。

太上皇帝

太上皇本漢高祖有天下後。奉其父太公之稱。非太公有天下。傳於子。而有是稱也。漢書高祖曰。父有天下。傳位於子。子有天下。尊歸於父。此人道之極也。今公卿大夫已尊朕為皇帝。而太公未有尊號。今太上皇。蔡邕曰。太上皇。不言帝。非天子也。顏師古曰。天子之父。故號曰皇。不預政治。故不曰帝也。又三國志王肅議曰。漢總帝王之號。號曰皇帝。有別稱。帝無別稱。皇者。高祖時其父見在。而使稱皇。則皇是稍輕者也。裴松之注。漢祖尊其父。其以天下傳子。而稱太上皇帝者。各史所載。共十四君。今記於左。按左傳。晉景公有疾。立太子州蒲。為君。會諸城。號曰太上皇。唐高祖立隋代王侑。尊煬帝為太上皇。此皆僭亂。華易時事。名同而實異。更不可列。

呂光即天王位。年號龍飛。在位十年。以老病。立子紹為天王。自稱太上皇帝。晉書

後魏獻文帝即位。後雅薄時務。常有遺世之心。在位七年。年十七。即內禪。使太保

陸馥。大尉源賀。奉皇帝璽綬冊命。皇太子升帝位。是為孝文帝。羣臣奏曰。昔三

皇之世。淡泊無為。故漢高祖尊其父曰太上皇。不統天下。今皇帝幼冲。萬幾大政。

猶宜陛下總之。謹上尊號曰太上皇帝。帝乃從之。遂徙居崇光宮。采椽不斲。土階而已。國之大事。仍以奏聞。孝文帝每月一朝。崇光宮。後改稱宣光宮。其後討蠕蠕。拾寅等事。獻文帝仍躬御戎車。承明二年崩。年二十三。魏書

北齊武成帝即位五年。年二十以天文有變。太史奏當有變易。祖珽乃上表言。陛下雖貴為天子。未是極貴。按春秋元命苞。乙酉之歲。除革舊政。今太歲在乙酉。宜

傳位東宮。應天道。乃上魏獻文帝禪子故事。帝從之。祖珽乃傳位於皇太子緯。是

為齊後主。時年十歲大赦改元。百官上尊號為太上皇帝。軍國大事。仍以奏聞。北齊書本紀

然是時武成帝仍往來晉陽鄴都。凡除拜生殺。仍自主之。後主天統四年崩。凡為太上皇帝四年。北齊書

後主緯隆化二年。時年二十一自晉陽戰敗回鄴。以周師日逼。乃傳位太子恒。時方八歲改

隆化二年為承光元年。尊後主為太上皇帝。後主先走青州。幼主亦東走。又禪位於任城王湝。以太上皇為無上皇。幼主為守國天王。不數日父子俱為周所執。北齊書

後周宣帝以大象元年。時年二十一傳位於皇太子衍。時年七歲詔曰。朕以寡薄。祇承鴻緒。上賴先朝得一之迹。下藉羣后不二之心。興隆國本。用宏天祚。皇太子衍地居上

嗣。正統所歸。遠憑積德之休。允叶無疆之慶。朕今傳位於衍。乃瞻四海。深合謳歌之望。傳子一人。高蹈風塵之表。萬方兆庶。諒朕意焉。於是自稱天元皇帝。所居稱天臺皇帝。衍稱正陽宮。朝廷政事。仍宣帝處分。大象二年崩。年二十二。周書

唐高祖武德九年六月。秦王世民殺皇太子建成。齊王元吉。乃立世民為皇太子。聽政。是歲八月。皇太子即皇帝位於東宮顯德殿。貞觀三年。太上皇徙居大安宮。

新唐書本紀書法如此。但言皇太子即位。而不言高祖傳位。以見其迫於勢之不得已也。以下皆唐書。

唐睿宗在武后時。已立為帝。後中宗歸為帝。睿宗仍為相王。中宗為韋后及安樂公主所弒。韋后臨朝。臨淄王隆基。睿宗子率兵討亂。誅韋氏及安樂公主。於是睿宗即皇帝位。立臨淄王為皇太子。先天元年。立為皇帝。聽小事。自稱太上皇。聽大事。

明年詔歸政於皇帝。是為玄宗。

唐玄宗享國既久。嘗欲傳位於太子。楊國忠等甚懼。使楊貴妃銜土祈哀。乃不果。

天寶十五載。安祿山反。帝避亂至馬嵬。太子從行。父老請留太子討賊。帝許之。遣

壽王瑁及高力士諭太子。太子乃治兵於朔方。因裴冕杜鴻漸等請。遂即位於靈

武。是為肅宗。尊玄宗為上皇天帝。遣使奏聞。玄宗遣韋見素房琯崔渙奉皇帝冊

至靈武。肅宗復兩京。至德二載。迎玄宗歸至咸陽。備法駕於望賢驛。玄宗御樓。肅

宗御樓。肅

宗御樓。肅

宗御樓。肅

宗紫袍望樓拜舞。玄宗降樓撫肅宗。肅宗泣辭黃袍。玄宗自為衣之。肅宗伏帝園。辭。玄宗曰：天下人心皆歸於汝。使朕得保殘齡。即汝之孝也。肅宗乃受。玄宗居興慶宮。乾元元年。玄宗入御宣政殿。授肅宗傳國受命寶。及符冊。號曰光天文武大聖孝感皇帝。肅宗又上玄宗尊號曰聖皇天帝。上元元年。肅宗病。李輔國矯詔遷玄宗於西內。寶應元年。玄宗崩。

唐順宗即位。病。乃立廣陵王純為皇太子。命權旬當軍國事。明年立為皇帝。是為憲宗。而順宗稱太上皇。元和元年。憲宗上尊號曰應乾聖壽太上皇。

宋徽宗宣和七年。以金兵之逼。先命皇太子為開封牧。尋詔皇太子嗣位。自稱道君皇帝。太子即位。是為欽宗。尊徽宗為教主道君太上皇帝。居龍德宮。靖康元年。徽宗避金兵。至鎮江府。金兵退。還京師。明年金人以二帝北行。以下皆宋史。

宋高宗自元懿太子薨。訪太祖子孫伯字行內者。育於宮中。紹興二年。得伯玖。賜名瑗。後封晉安郡王。三十年立為皇子。更名瑋。三十一年。金海陵入寇。瑋從高宗至金陵。已而海陵被弑。金兵退。高宗自金陵歸。三十二年立為皇太子。改名昀。高宗久有傳位之意。至是乃降御札。皇太子可即位。朕稱太上皇帝。退處德壽宮。遣中使召太子入禁中。太子趨避殿側。高宗勉諭再三。於是高宗出御紫宸殿。宰相

奏事畢。高宗還宮。百官移班殿門外。拜詔畢。復班殿廷內侍。掖太子至御榻前即位。是為孝宗。孝宗是時猶側立不敢坐。內侍扶掖至八九。乃略坐。宰相率百官稱賀。孝宗遽興。宰相升殿。固請。孝宗愀然曰：此大位恐不克當。高宗即駕往德壽宮。孝宗步送出祥曦門。冒雨掖輦。至宮門不止。高宗麾謝再三。令左右扶還。顧曰：吾付託得人。無憾矣。自是每五日一朝德壽宮。百官月兩朝。高宗詰每月四朝。孝宗上高宗尊號曰光堯壽聖太上皇帝。孝宗終身備極孝養。兩宮無纖毫間隔。至漉

熙十四年。高宗崩。年八十一。凡為太上皇帝者二十四年。孝宗行三年之喪。宋孝宗漉熙十五年。詔自今御內殿。令皇太子侍立。十六年二月。詔傳位皇太子。以德壽宮為重華宮。是日孝宗吉服。御紫宸殿。行內禪禮。百官稱賀畢。內侍請太子坐。太子固辭。內侍扶掖。乃即位。是為光宗。光宗是時微坐。復興。丞相率百官賀禮畢。樞密院奏事。光宗仍立聽。班退。孝宗反喪服。御後殿。光宗侍立。尋登輦。同詣重華宮。光宗還內。上尊號曰至尊壽皇聖帝。

宋光宗紹熙四年七月。以後因疾不能朝。重華宮。明年孝宗疾甚。光宗仍不能朝。孝宗崩後。亦不能過宮行喪。乃立子嘉王為皇太子。趙汝愚密請太皇太后於禫祭日。命皇太子即位。尊光宗為太上皇。至日。眾官扶太子入素幄。披黃袍。太子卻

立未坐。汝愚率同列再拜。須臾催仗訖。百官班定。內侍扶掖。乃即位。是為寧宗。寧宗詔建泰安宮。以奉太上皇。自是五日一朝。尋詔以秋暑。太上皇未須移御。即以寢殿為泰安宮。上尊號曰聖安壽仁太上皇帝。慶元六年崩。

明英宗土木之變。陷於也。先皇太后諭立皇長子見深為皇太子。命郕王英宗輔弟之代總朝政。後議者謂特方多難。宜立長君。皇太后亦遣太監金英傳旨。郕王宜早正大位。於是郕王即帝位。是為景帝。景帝遙尊英宗為太上皇。後也。先送英宗歸。景帝奉迎之禮甚簡。將至京。始備法駕於安定門外。英宗自東安門入。景帝迎拜。英宗答拜。各述己意。遜讓良久。乃送英宗於南宮。羣臣就見而退。後羣臣請朝英宗。萬壽聖節及元旦。景帝皆不許。已又廢太子見深為沂王。而立己子見濟為皇太子。又殺侍英宗之太監阮浪等。皇太子見濟尋卒。御史鍾同等請復儲。皆被杖。並伐南城中高樹。英宗危甚。及景帝不豫。石亨徐有貞等迎英宗復位。明史以上皆歷代太上皇故事。北朝諸君。固無足道。唐宋則名分典禮。各著稱史冊。然洪容齋謂唐四君。順宗以病不能臨政。高祖以秦王殺兄弟。明皇幸蜀。太子擅立。惟睿宗傳位。發於誠心。然至先天二年。太平公主被誅之明日。始盡行歸政。則猶有不得已者。惟宋高孝兩朝。為千古所未有。云此固確論也。然南宋國

僅偏安。嗣君又非親子。究不得為大全。惟我

高宗純皇帝。當大一統之運。臨御六十年。親傳寶位。猶時勤訓。政享年至八十有九。今上自受禪後。極尊養之誠。無一日不親承。

色笑。視宋孝宗之一月四朝。曾不足比數焉。然則

兩宮授受。慈孝兼隆。福德大備。真開闢以來所未見。豈不盛哉。

廿二史劄記卷十三

卷十三

十三

